

原

富

原富部乙目錄

引論

篇一積貯分殊

篇二論泉幣

篇三論人功有生利有不生利

篇四論資貸息債

篇五論役財治生之不同

原富部乙

英倫斯密亞丹原本

侯官嚴復幾道翻譯

引論

民群雜合。無所用於積貯。積貯者。先事而事。分功交易。所得而後行者也。今其民日暮之急。所欲甚微。日用所需。皆仰於一己。衣食則獵鮮而皮服。室居則復穴廬。幕倚樹。率雖無事於交易。無待於分功。則亦無用其積貯矣。是故初民無積貯。

降而通功易事之俗興。民乃知生事之資於一己者至寡。而仰於儕偶者至多。於是或即物相貿而爲交易。或取用易中而爲售沽。然是不可以驟至也。必已有其物而後行。欲已有其物。必有所業。欲有所業。其治業之際。必有以養其身力者。非有前積。烏以養乎。且其業繁。則所以飭材庀器者。其事亦至纖悉。方其業之未卒。其物之未售。皆有待於積貯之日也。故曰積貯先事而事。否則事無由立。而通功易事之俗。雖

至今不興可也。

積貯分功二者相爲用切而相爲始微非積貯無以爲分功亦自有分功而積貯乃富積者益厚分者益繁矣作者之人數不必加多乎前功分則爲之自疾而需材必多所操者簡新機將出其爲之愈疾其需材愈多故功既分欲勞民之無棄時而曠業者非積貯甚富不能也糜食之費即不必增其物材之所需者衆矣況功分利廣食指必加也哉蓋食工飲材二費視分功之疏密而並進矣故曰相爲用切然亦食指多而後分功密故曰相爲始微

案人群分功之事莫先於分治人與治於人者故積貯既興則或享之以勤事或用之以督功不如是則事不舉然則謂有積貯而後有分功可謂有積貯而分功自生不可嘗見西人經營海外新墾地往往人工未集所挾貲財坐食立盡則莫相督之故也故國無論古今但使未實之地過多田價甚賤則其勢不能用雇工欲地利之出而興分功之制者非用奴工不可五洲諸國其始莫不有奴而南北

美洲掠賣黑奴之禁至十九稔中葉而始效中國僮奴之制降及元明不禁漸寡
至於 國朝不少概見蓋生齒日蕃其法無所利則其俗不待禁而自去也

爲疾必由積貯之多亦積貯既多而爲之自疾蓋發貯食功之家莫不欲循最善之
程出最多之貨功之可分者莫不分機之宜庀者莫不庀而其爲是之量自視其發
貯之厚薄與所雇手指之多寡以爲程故國之富者其工業必殷

案積貯既多爲之自疾其言稍過觀見前案

以上所言聊資發端粗及積貯功用之大略後此所論則積貯爲物之性情與在國
財之徵驗凡分五篇首言積貯之所爲分次究一國見財之體用次言財利生耗之
大原次指資貨相通之公理而以母財異用之效終焉總是五篇以翼於儲蓄蓋藏
之道物產生耗之端粗有發明云爾

篇一

論積貯分殊

享而有餘。度以待需。是曰積貯。方一夫之所積甚微。數日兼旬。不濟將竭。惴惴然固守而謹用之。幸附益以時。俾勿匱。此凡小民恃手足以贍口體者。其積貲多類此。謂彼將斥之以規後利者。無是爲也。

進而所積者厚。足支數月。期年。則斥其多少以規後利者。恆智之所與也。且暮之所資。固不能無以待。區少分焉以相支持。俟新利之生。足矣。是故一家之積貯。常可分爲二物。一曰母財。一曰支費。母財者。食功發業。所斥之以規後利者也。支費者。即用即享。所區之以給旦夕者也。支費所由。不外三者。舊儲之財幣。一也。隨時所附益。二也。服器儲蓄。方用未艾者。三也。

發貯食功。治業求贏。是謂母財。母財亦分二物。一曰常住母財。一曰循環母財。循環母財者。主於變易流轉者也。由財殖貨。由貨爲財。財復成貨。周流無滯。而後利生。方財之在棗。貨之在庾也。既常爲其一物。斯無利之可言。故必資於循環。常住母財者。主於便事益力者也。出財治田。濬溝導流。而所收倍前。購設機器。建立行店。居以倉。

賡行以舟車有者利優無者利細以其利在保持享用而不即毀也故曰常住

生業不齊而二本相待之率因以大異行貨之商其倉廩舟車不已有者其母財皆循環也若夫居肆之百工其母財則多常住者然亦視其業而有多寡之差縫紵之工所擅以售業者不逾鍼剪斗尺至微約也履屨之匠其器差精而所多有限至於織工則大過矣大匠工師役雇傭夥常住而外循環亦多其傭工之廩餼所業之物材皆循環所用之以畜材鳩工而收利於成貨者也常住母財大者莫若大冶冶人陶均之爐輔辟瀟之碓捶破山之鑽屏水之機其值動以鉅萬自縫者之鍼至於大冶冶人之機器其間常住母財多寡之異等殆不可以一二數也

其在農功則倉廩田器爲常住田傭廩食爲循環夫常住循環皆以規後利而所以得之之道不同常住者以宿留而得利屬於主人者也循環者以錫施而得利離夫主人者也譬之用兵循環者所以爲戰而常住者所以爲守是故田畜馬牛以其植言則爲常住以其食言則爲循環前以宿留後以錫施而後利出也等田畜也養之

不以力田而以入市盡循環矣。不以力田不以入市。而以其蠶酪乳爲利資。又爲常住。而其芻豆其莖之屬。則循環也。至於穀種。山倉而隴。由隴復倉。可以爲循環之母歟。曰非也。其爲物未易主也。未獨施也。農之所售。非其種也。售者其種之所孳生。則亦常住而已矣。蓋二者之分如此。

國之積貯。編民積貯者之積也。故亦區之而爲三物。曰支費。曰常住。曰循環。一者所以養。而二者所以生。

一曰支費。凡國民所卽用卽享卽耗卽銷者是已。其異於他費者。曰不規後利。類而言之。若積倉俵糶。若衣裳冠履。若器械供張。若陳設玩好。久暫不同。消糜則一。即國中之居室屋廬。亦從此屬。夫居室屋廬者。國財之一大宗也。於是疑者曰。謂廬舍爲支費者。若民之營築以自居是已。獨至繕宮室以貨人。其歲月所收之僦費。固明明後利也。而猶不得謂爲母財者何居。曰是猶有辨。所謂宮室者。非人人所私之宮室。乃通國所有之宮室也。故雖繕以貨人。自主者之私言之。則爲母財。自一國而觀之。

則猶卽享卽用之支費耳。不得以爲母財也。蓋曰母財則有所生。彼僦屋之所歲納者。其財必由他道。若土田之租。若人力之庸。若母財之息。出之於彼。用之於此。不自屋生也。既無所生。斯不稱母。是故自通國而觀之。雖開閭閻。壯侈觀闐。崇隆於其母財。不加毫末。若必自一家之私者而言之。則豈徒室居之大者而已。將衣裳械器玩設圖書。苟不自用而賃人。則皆有所收利。如常用之供張。間用之娶車。以此賃人。隨地而有。究之其物皆無取於生財。則同爲國中支費已耳。支費之糜。宮室臺觀最久。數百千年者有之。降而械器之數十百年。衣裳車馬之僅以年月。肴饌酒食之盡於一餐。久暫懸殊。要爲同物也。

支費而外。則皆母財。母財首常住。常住所與他母財異者。在不必易主而利生。一園之中。所可指爲常住母財者。有四屬焉。一曰機器之屬。凡善事之器。益力之機。生財事均。以得其物而生之益疾者。皆此類也。二曰倉廩之屬。其爲物與支費所屬之居室屋廩物同。而用異。居室屋廩雖有儲貸之利。而利不從生。倉廩屯棧列肆行店。其

做賃費同。而用者有生財之效。則其物固與機器等耳。三曰積功。則凡綢繆脩治之費是已。譬如民有土田。斥其積財。以及夷蕪崇。治培塿。使其地美。有加乎前。又如國家平治道塗。削險填壑。開淪河漕。用利舟車。凡此亦費用於一時。利收於他日。而其利用之永久。方之機器爲有加。四曰能事。凡從師服習之費是已。夫民非生而巧生而習者也。固必先有其勞費者。所學所肄者其業。而工巧便習。被乎手足耳目心思之間。而生財之功。於以益疾。其爲物與前三者。雖有虛實精粗之殊。而理無以異。故同爲常住母財也。

其次曰循環。循環者。必經轉易而後利滋者也。一國之中。所可指爲循環母財者。亦有四屬焉。一曰泉幣。一國一時之見財。所資之以爲易中者也。泉幣自爲流轉矣。而百貨亦待之以周流。儀散於國中。使民各得其所用享。各收其所分有者。故泉幣者。循環母財之魁首也。二曰食穀。之在農。肉之在庖。牛羊鴨豬之在牧畜者。酒漿之在釀製者之家。皆必待售而後利出。三曰材若布帛。若金若木。凡工之所資者是矣。卽

如工之所致若繙絡若械器者室廬使其猶在織者作者築者之家不以服處而以售沽則皆此屬矣四曰貨凡民生之所仰其物既成而未以用享離乎工而入於商或在通轉或在屯聚必其既售後利乃出皆是物矣是故循環母財首泉幣而其三則農工商三民之所分致者

案斯密氏以泉幣爲循環母財之魁首此亦本其待調施而後出利者言之爲義自確顧泉幣循環矣而亦有其可爲常住之理者蓋泉幣爲物自其在人篋笥囊褚言之不經易主則渙然無所能生不名之爲循環母財不可自通國泉幣言之則易中若干乃流散行用之公器所謂國中百產待之而周流儀散者其爲用正與道塗舟車等耳磨礱耗盡固有其期必賴歲月之彌補而後可相引而長且圖法愈精其爲常住愈著獨至兩國通商則又爲循環之母是故同一泉幣也以對待交易言之則於母財爲循環以一國國法言之則於母財爲常住且使合字內之所有言之將愈爲後物而非爲前物矣在樹則爲寄生在盆下則爲壅數物固

不可執一以求也。竊謂斯密氏於此既以通國爲論。固自以爲常住。故後云循環。中此物最與常住母財相似。銷磨耗柱。其事皆同也。

國之積貯。有支費。有母財。母財有循環。有常住。常住四物。曰機器。倉廩。積功能事。循環四物。曰泉食材貨。泉者國家之圖法。懋遷之易中。食與材貨。農工商三民之所出也。民生之日進也。之三物者。時時由循環而化爲常住。抑化爲支費。繼繼繩繩。相資不匱。一群之常住母財。其未立也。待循環而後立。既立之後。尤必賴循環者爲之維持補苴。而後長久。一機器之庀立。一倉廩之建造。將以善生財之業。其始也。無一不仰於農工商之所生。其繼也。非食與材貨。且無以爲耕完蓋治。其廢可立而俟矣。且常住母財。亦必得循環者爲之輔。常住者不能自生也。雖有至精之機。最善之器。其所爲使者人。其所有事者物。苟非循環之食與材貨。烏能效乎。疏淪土壤。渴鹵爲腴。所費常住母也。使非得食。爲之糜薪。夫佃田畜稼。穡穡數倍之利。將就從而播種之母財者。所以致支費者也。支費。卽享用。卽耗。卽銷者也。所以養者也。常住循環二

母之爲用皆以求支費之不匱而加豐故一國貧富之實視母財所致支費之饒儉致之雖遠享之則近致之雖勤享之則逸也

積貯三物而支費常住二者皆仰於循環故循環之爲母財其勢有尾閭之洩是非有歸墟之注其物之不可以久明矣歸墟爲乎在曰地地之所以益母財者三曰田曰礦曰澤三者之所登生貨也被之人功爲熟貨農工商得此而後不匱故積貯仰於地而無窮洩之雖奢而注之者富也泉幣之所恃以持其空乏者礦也今夫一國之泉幣其由盈趣虛固不若食材貨三者之易索爾然而摩毀銷泯與散而之外國者歲不足而紀有餘使不得礦之所產者以持之經數十百年所謂圖法者將掃地無餘抑泯泯大亂矣則其有待於地產之供雖未若三者之亟亟而亦不可緩也

田礦澤三者之所興皆待母財而後殖常住循環二者不可偏廢至於課其所收則不僅復其母財益以贏利而已一群之民皆有利焉是故工者一歲之所食農者爲復其糧農者摩礱之所損工者爲復其器此群民交易之眞道也至農載其所割穫

者工取其所作治者以會於日中之市猶其淺顯者耳治化既蒸交易之事日蹟以繁而理則不滯於其朔故樹畜之民不必以其五穀牛羊與布帛陶冶之家爲易也是之拙滯得易中之用而已祛至分顧各得之餘其效與初民之日中爲市者正等其究也庶績百工皆相爲用田之所出有以復礦澤所耗之母財粟之登有以出魚於海牛羊之利有以采金於山展轉相生有不可以數計者大抵田礦水澤之利其肥饒相若者所產視斥母之廣狹母財之廣狹等者所產以肥饒爲差此則可知者也

國上無虧度下莫侵欺則民有固志而貨殖利興積貯之家或出之以厚今日之奉或役之以冀他日之贏爲其前歟則卽享卽用之支費也爲其後歟則循環常住之母財也循環以求贏者也常住萃以求贏者也是三者有財所莫能外也夫使其國之政理平刑罰中家承儲蓄鄰可相通三者之中不一由焉則敝民不惠者附不足算也

若夫化淺治衰國無兵刑內有暴君外有強寇丁此者天下至不幸之民也假有私財往往掩瘞覆藏以爲隱固國而如此雖富猶貧家而如此雖豐猶嗇往者分土據亂之時英法之民亦多行此而今之土耳其印度洎泰東諸國此風尙存則積貯之藏聲蓋藏之外道吾聞中古大國名王不知取藏錫以益私財爲可恥遇有煙蕈蓄聚經發覆而莫徵誰屬者見金之人藏地之主法皆不得名其財必獻國主此當日法家所目爲絕重之一事而著之令甲者也金銀礦產同此獨至銅鉛鐵錫硝煤礦丹又以不足貴重之故聽民自取此皆稗政荒俗之尤烏足論哉烏足論哉

篇二

論泉幣

前之釋物價也謂合租庸息三物而成之市中諸物價合三者其常合二者其變卽無所合而止一者亦間有之合二則無租僅一則純庸物價之所還不能外前三物者不租不庸則爲具母者所得之贏利矣以一物言之如此物物言之如此則通國

一歲所出之物盡如此。故國中歲產其價不離三物。而分利之衆亦不外有地之主。勞力之氓。與廢居逐利者之家。

通國歲產其利分三民矣。顧常俗之計利入也。有總實之異。故租有總租。有實租。有總贏。有實贏。總租何。凡田主所受於佃者之全數也。實租何。經營之所費。培葺之所需。與一切爲田而用者。則減之。減而有餘。實歸田主。而惟其所欲爲。爲母財可。爲支費可。保持用享。凡几筵之宴設。車馬之雍容。泊夫潤屋施身。娛憂遣日之事。皆得爲之。故田主之富厚。於實租有比例。於總租無比例也。一實租實贏常俗所謂淨租。淨贏。

田主如是。餘民亦然。民財如是。國殖亦然。國殖非他。民財之合者爾。是故論國財之進退也。不得徒即地之所出。民之所登。凡一歲之總殖而計之。欲等國財必計實殖。謂實殖。國之歲進。以補直通國常住循環二母而外。而尚有餘得儲之以爲支費。即用即享。飲食藻飾。戲豫馳驅。奢而無損。度不可者。夫此之謂實殖。故一國之富厚。於

實殖有比例於總殖無比例也。

國有常住母財。然必繕完而後常住。械器舍宇舟車道路之歲修。待材與功而後舉。是材與功非實殖也。其間作者所受之庸錢。則爲實殖。彼固受之以卽享卽用者也。百工所治成物受價。價歸之己。物歸之人。二者皆所以卽用卽享。則異於繕完常住者。而爲國中實殖之屬。惟實殖廢而後國宮增。

故所以保持常住者。誠有損於實殖。而不保常住。實殖又無從增。田廣狹瘠沃均。其一有倉廩焚圩溝塍徑陌之用。其一蕩然無有。抑有之而圯廢不治。則田作之手指雖同。而彼之所收逸而多。此之所收勞且少。無疑義也。工之多寡巧拙均。其一得新機之用。其一無之。則有之者之所出。將什伯於無之者。又無疑義也。是故常住之用。得其術則所費者微。所益者鉅。計其所益。彼保持之費。有不足言者矣。而論者猶以保持常住者爲糜財可乎。雖然。以是爲糜財固不可。而卽謂之曰實殖。則又自亂其例而不可通矣。向使無保持常住之費。則是歲國民之支費。將以立舒。以今之有是。

其勢不能無節。而富厚之樂坐減。故曰不可謂爲實殖也。由是而知一機器出其致物成事之效均。而價廉費省者。則其有益生民甚鉅。蓋由是則保持常住之費輕。而實殖以進。進者不用之於支費。則歸之於循環。用之支費。民生日休。歸之循環。後利彌廣。一廠之內。前者機器之費。歲必千鎊。後得新機。降爲五百。則所餘之五百鎊。將以增收物材。多養匠指。此其爲一群之利。不顯然易明者耶。

國中保持常住母財之經費。無異私家田宅之有歲湊歲脩。蓋有歲湊歲脩。而後田宅之利可久。而總實二租。皆不至於坐耗。然有時以指注得宜。能使湊脩之費大減。而功效同前。則主家總租。雖不必有所增。而實租則必大過往日矣。

所以保持常住母財者。必不得闖入一國實殖爲計。而所以保持循環母財者。又與所以爲常住者不同。蓋循環母財。不離四物。泉幣其一。而農工商之所歲殖者其三。農工商之所歲殖。有時時化爲常住。轉爲支費。爲支費者。皆實殖也。是故凡以增益農工商歲殖者。皆與一國之實殖無所減。惟泉幣爲常住者。於實殖乃有減也。

由此言之。通國循環之母。與私家循環之母異。私家實利。必卽其贏而計之。不得指循環之母以爲之也。至於通國。雖要爲私家循環之積。然通而言之。固無礙其爲一國之實殖。賈者行店之所居。必不得視爲其家之實利。可以爲卽享卽用之資。而自通國言之。則皆斯民之所用享。取者復母加贏爲價。於售者固無損也。

是故增益保持。欲國中循環母財之常足者。獨泉幣一端。乃於國之實殖有所損蓋。泉幣爲物。雖循環母財之一端。實則與常住母財有極相似者。此可分爲三事而言之。

一曰其營造保持之費。有損於國之實殖同也。三民之家。則於致物阜財。於是有機器之設。有善事之資。是固不可以徒得而恆有也。待財以立之。待財以久之。而其費皆由總殖。則實殖以之坐減。泉幣亦然。始之鼓造。繼之彌補。皆仰度支。而歲殖乃因之而見少。三品之金。鑄冶之作。其勞力糜財。非以使其民所卽享卽用。飲食燕樂之物蓄也。乃以爲交易便事之大器。有之而後國之歲殖。得以俵散焉。得以流轉焉。而

於國之實殖則有損矣。

二曰綜一國之歲殖則泉幣常住二者皆不得闕入歲計也。蓋泉幣者通財之輪轂而大異於所通之財。故綜歲計者既會百產而得其總數矣。必勿闕入通行泉幣之數而後得之。無角尖之微而可謂爲歲殖者也。夫曰泉幣非財而綜國歲殖必去此而後得其真。此正言若反。而世俗未有不大大訝者也。雖然何訝。名實之淆致有此耳。苟析而云乎。則婦孺可以解。今夫世俗之民財而舉一數也。有專指蕪然而黃耳然而白有輪郭文重者而言之。此意主於泉幣者也有其意不盡主於泉幣而兼及於其所具之易權與其人所得取精緻物者而言之。此意主於權力者也。今假有云英倫全國通行泉幣爲十八兆鎊。此則專指三品見錢爲國中所有行用者。假有云某甲歲入千鎊若出鎊。此不惟專指其每歲所收之金銀銅幣已也。意乃在其備物致用之權力。何則。彼之所收雖無角尖之金銀銅而其備物致用之權將自若。故知常法名財之頃名雖稱泉幣之多寡而意實存於權力之閒。而其人貧富之差即以此權

之大小爲異。又如人稱某甲旬月之俸爲一幾尼。意乃謂彼有此幾尼。則餬餒揄曳之量。如其所易。必不云彼有此一枚。贅爾之金。遂可爲飽煖也。設異日者。彼之支俸。不以金錢。而以楮契。則前之所受者在金爲金。將今日之所受在楮爲楮乎。苟知今之以楮在楮之所易。則前之以金亦在金之所易矣。夫金楮同物。皆以約行。苟無可易。則皆成棄。此一人之俸然。通國之俸亦莫不然。其富有之實。皆不在幣而在其所與易者。既爲國富之所不存。斯爲歲殖之所不計。又有進者。一國之泉幣。常遠遜其中所有之實財。一枚之幣。今日用之以稟甲。明日將用之以稟乙。又日將更用之以稟丙。同物也。而所代者奚啻於三。幣不虛行。將必有其所與轉者。然則知國幣一而國殖恆數倍之不啻矣。前云英幣十八兆。而吾英國殖之不啻於此。不待智者而後知也。故曰泉幣者通財之輪轂。可謂爲母財之一宗。不可指爲一國之經入。雖其用至重。民必得此而後利有所俵散。貨有所流轉。民以各得其分焉。而徂者遂並此以爲國財。斷斷乎不可也。

案一千八百六十八年計學家耶方斯統核英三島國幣金八十兆鎊銀十四兆鎊銅一兆鎊共九十五兆爲在民間流行之數而官庫銀行積貯又十五兆鎊則統一百一十兆也一千八百五十六年英國國幣不過七十五兆鎊十三年所進如此遞年所增不在二兆以下也

三曰苟營造保持之費可省而適用維均則於國財有大益此泉幣之爲物所與常住母財又極相似者也前論常住母財也曰一機器出其致物成事之效均而價廉費省者則其有益生民甚鉅故國家於泉幣能使便事效均而營造保持之費大省者則其國之實殖亦將緣是而加進二者之理同也蓋國中常住母財歲不能無耗損所以脩葺繕完俾常及事者在一國歲費常爲大宗而致減於實殖甚鉅廢居逐利母財之用不出二塗非其循環則爲常住後消而前長者自然之勢也故苟有術焉能使所以保持常住者因之以約則飼備購材之母將以日增生業以之益進民生以之益舒其歲殖焉有不大進者乎常住如是泉幣亦然故吾將繼今而論鈔法

鈔法者何。國有泉幣矣。乃置三品之金而代之以楮。所代之數。如其所欲名。其爲物之於泉幣也。營造之奢儉相遠。而易挾過之。通財輪穀。得此而益便益輕。而營造保持二者之費皆省。此其流轉之情。而於國殖相關之理。奧隨繁衍。所未易猝言者也。鈔之名品繁殊。而鈔商所行者爲最著。其用亦最宏。鈔商起於私家。設其人財產之豐。然諾之信。與其理財之智。爲一時人之所倚任。則可造印剖符。周流無滯。與制幣均。然其所以利行者。以可立轉金銀制幣。如所名之數故耳。

設一鈔業。其行鈔貨商。至十萬鎊之數。此十萬鎊者。爲用與制幣均。資者按期納子。亦與見財無異。則行鈔者之贏得也。雖所發之鈔。不必盡行。然使立業日久。而爲人所倚信漸深。終必有大分焉。常在市園流轉。常法出鈔萬者。儲二千以應不時之需。已足周事。如是則自國中行鈔。其見財常以二千收一萬之用。舉凡懋遷挹注之事。貨物之所以銷。屯聚之所以散。用鈔尤便。國之見財一。其爲用恒五。此用鈔之實形也。

又使其國之制幣所仰以周事者得百萬而已足繼而鈔業群興其行鈔亦百萬而止分儲二十萬以應不時之需是則其國所流轉者通百八十萬其八十萬爲見財而百萬爲楮幣矣顧國之歲產又不以楮幣驟多之故與之俱增農工商之業既均乎前則其勢必用其百萬而餘其八十萬國之用幣也若渠之仰水然渠之深廣同初而灌者之流乍長其勢有溢而旁流而已今者以百萬之渠受百八十萬之注是八十萬之不敷固其所已雖然不敷矣謂必置其財於無用則其勢不能不用之於國中且用之於國外國外楮幣不能行也一則以支取之無從再則以國律之不及故不受也其究也將楮幣處而見財行自然之勢也

百萬之鈔行於國中八十萬之真幣行於國外其外溢之多如此雖然財之外溢豈徒然哉以償兵費以輸貢獻非所論已舍二之餘必有所易有易之以轉輸他邦求贏利者有易之以自銷本國贍民用者如前之所爲則貨轉他邦利歸本國其實殖必進與斥新本以興新業者同科故鈔行國中則見財爲新本於國外而民業閤矣

如後之所爲其事有二或以養惰民之欲若於酒若綺縠致耗物力而靡所更生或以給勞民之求比財用時儉糧物不虛糜而後利彌廣前之所爲縱侈增華耗而不生國財坐消損之事也後之所爲獎勵勸功耗財所以生財而實殖歲進益之事也雖然利用厚生民之恆性侈靡耗財之子國而有之而規後利以求有餘則人樂自致者也故格幣既行見財外轉其互市致物雖有損益之二塗而自事實求之則益者常過其損者而其國莫不因之致富也或謂金山於地產而有限鈔行以人意而無窮故行鈔之家但使可通雖無實可以坐富此以一二家言則或有之至以一國之民言之行鈔於見財之數無毫末之增也故國中惰侈之家不以鈔故而歲入驟進歲入不進則耗而不生之外貨來者亦不能多故鈔行而見財外轉其有造於勞民者至優其附益於惰民者蓋寡是與前說有互相發明者矣

由斯而言吾謂綜計歲殖必勿闕入泉幣者愈可見矣蓋勞民勸功視國中循環之母夫循環之母四物泉幣與農工商三民之所興而民功所必待者坯樸之材也善

事之器也。稱事之餽廩也。彼泉幣既非坏壞之材。又非善事之器。雖餽廩常以泉幣行。顧勞民之所以贈口體周家室者。非泉幣之能爲。而在泉幣之所與易者。使國空虛而莫與易。則泉幣固不可衣不可食者也。曷足貴乎。是故計一國養民之實。綜糧食物材成貨三者而不計泉幣也。

既具母財。欲計所興民功之多寡。視所贍工民之數而可知。夫贍工民云者。界之物材也。周之器用也。頒之餽廩也。吾非不知易中既行之後。是三者皆可以泉幣而得之。則計三物不如計泉幣之爲徑也。雖然。欲綜國功。計三物可。計泉幣可。已計三物更計泉幣。必不可也。況言國財宜求之於其實。則計泉幣固不若計三物者之近真也。

是故鈔制善。則惠工之政莫大焉。蓋鈔行將使贍工之三物驟增。其所增之數。如所代三品制幣之數。鈔之未行也。是三品者。固國中通財之輪轂也。民用方殷。未由外溢。鈔之既行。三品外溢。所以致贍工之三物於國外。卽以阜循環之財於國中。昔

爲制幣所以轉物。今成母財所以惠工。此其事猶唐肆大廠之中。主人以用新機費約於舊。即用所約以爲雇工購材之資。而業以益閱。工以益贍。此又泉幣爲物與常住母財同體之一義也。

每欲衡國中泉幣與歲殖之較率。而苦於難知。或曰國幣一者歲殖五。或曰國幣一者歲殖十。或曰幣得國財二十之一矣。或曰三十之一矣。其逕庭如是。雖然。國幣與歲殖衡其較率恆小。而以與贍工之母財衡其較率恆大。何則。通國之歲殖所區以贍工者。常居其小分故也。故楮幣既行。則見財之留。例由五而之一。設取其所餘五之四者。爲物材器用餼廩之資。則其所以惠養勞民者甚鉅。而國中地利人力之所出。必緣是而大進也。

案歲殖爲每歲通國之所產。計學家耶方斯嘗核之云。英三島國幣於其歲殖在六七或八之一分。不能遠過也。

凡此所云。夫豈待遠求而後有以佐吾說乎。蓋即蘇格蘭最爾之區。可以見矣。輓近

二三十載。蘇格蘭版克林起。都邑墟集。往往有之。其著效於吾蘇之民。則一國中貿易略大者。皆以楮行。而銀不概見。見者獨小小相兌餘耳。至於黃金則更少。雖諸家版克經營生業。良楮參淆。不盡可信。致議院爲著特令。以杜姦欺。然總大效。其有賴於國計民依。其溥。嘗聞吾蘇故老言。格拉斯高自版克肇有。楮幣通流。十有五年。生計自倍。又額丁白拉自兩版克立。蘇格蘭全境工商之業。四於厥初。兩版克者。一蘇格蘭版克。以議院特令立於一千六百九十五年者也。一曰賴耶版克。賴耶本梵語譯言王家。一以王命冊書立於一千七百二十七年者也。其爲時之暫若此。而民業之致盛若彼。此其言之可信與否。固未易云。籍其信然。其事或不盡由於版克。天運人事。民俗教化。實兼爲之。顧此三十年中。蘇之國富民勳。隆隆然如朝曦方升。不可抑遏。而版克之立。爲大有造於茲土。則雖欲勿信而不能也。

一千七百七十年。英之南北尙未合併。蘇格蘭令民間銀幣。輸局更鑄。其據冊可覆案者。計四十一萬一千一百十七鎊十先令九便士。金錢以不繳故無可稽。然據舊

藉穀之所敷造者。值不下銀錢也。或謂英蘇未合之先。蘇之制幣。通轉民間者。不減一兆。其言近信。蓋下令收銀幣更造時。民或不信。未盡輸局。而英幣漸行國中者。亦多所不計也。當是時。民間所用易中。多三品制幣。而楮幣絕少。此由蘇格蘭版克初立。行鈔未旺故耳。至今觀之。則蘇格蘭錢鈔並行。統計不下二兆之值。而三品制幣。不過四分之一。其餘則皆鈔矣。此雖見財降少。而物產民業。則反是而增。可以知其故矣。

版克經營之業。以收買期約發行楮幣二者爲大宗。而其事有相得之用。則倍稱之息以舉。收買期約者。假如甲乙二商。甲取乙貨。約三月若半年付價。立券與乙。名曰吡勒。一此名交易單。亦曰期票。一乙不俟期熟。以券與版克。易見錢。版克則受券。以券所名之數付乙。而逆計此時至期。其應收之子錢減之。名曰豫息。顧此所與者。雖名見錢。實非見也。特本業楮幣已耳。他日期屆。版克持吡勒向甲索償。如約收全數。如是。彼版克以財貨商而收其息。一也。豫息坐減。出母前少。而計息後多。二也。所付

者乃本業之鈔流轉市廛取無定期。摺萃既多可挹之以濟他業。三也。故終而計之。版克所贏率常過於通行之市息。此鈔業之所以利行。而倍稱之息之所以舉也。蘇小國其商業視英相去恆遠。當兩版克初建時則尤索落不足道。使以常術行之則買期既參而楮幣之行抑無由廣。有能者出乃創除貸之法以楮通之而商民交利。賒貸法者民欲爲買而資版克之財則覓所謂保誠者二家定所資之限依限出納。而版克職其簿課其息焉。如版克欲止勿貸而資者子母不如約還則責償於保誠。吾聞此法東西二洲隨國多有而吾蘇行之獨有富民之驗者。則以規約獨周寬大不苛民重然諾之故通商惠工勵民美俗國之受利固多矣。而版克之獲利尤不貲也。

今如有人與版克約千金爲賒貸其償法得隨時分納自以百計至以十計勿拘而版克爲視母課微息按日爲之至於子母悉完而止若更始自此法行民皆以此爲最便而惟恐鈔業之不盛而僥也則相勸爲之而樂通其鈔以爲交易交相勉爲賒

貸交相讓以守約。版克以鈔與商賈。商賈以鈔與工者以求貨。工者以鈔與農牧以
庀材。農牧以鈔與田主以完租。田主更以鈔與商賈以致水土百物。而商賈終以鈔
納除貸之數。通國民業幾無往而不用鈔焉。一法立其得民多助如是。其業焉有不
久大者乎。

以有餘貸。故商者得廣其業。而無冒險逐利之憂。今如倫敦額丁白拉二商。其母之
多寡正等。額爾除貸而倫商無之。由是倫商之治業也。優籌之中。常必有見錢以應
所與貿易者不時之求索。今設所儲者爲五百鎊。則未應之頃。常有五百鎊之滯財。
其應出之贏利。應養之人工。由是皆少。商而如是。則一國之生計。所損邱山矣。況商
之所儲。不僅五百者耶。獨至額爾則不然。彼以除貸之故。有所需而後貳財應之。財
無滯者。盡家之財。皆有息利。盡已之有。皆以養工。而又無爽約愆期之可慮。商而如
是。則一國之獲利亦固矣。或謂英之版克有豫息之事。其便與除貸等。不知蘇之版
克。非不豫息也。豫息之餘。益之以除貸。故於商業尤利便耳。

案斯密氏所言大抵皆當時情事不可以概論今日歐美之商業也彼云蘇格蘭版克豫息賒貸兼而施之其利商益民過於英之版克此其言亦未盡也蓋版克豫息賒貸之爲其大指皆以通鈔而鈔之通也近之一國之市遠之一國之中其受鈔之量皆有定限不可過也使味而過之則鈔朝出暮歸於版克無毫毛益而應支之煩時有鱗萃臨至之慮且夫鈔行既有定限如此則微論通之以豫息通之以賒貸用其一而置其一抑兩利而俱行之則於及限而止耳又何別乎使其市之受鈔百萬爲量其行於豫息者既盈此數雖不爲賒貸無損即欲爲賒貸不行故曰其說未盡也獨其云得賒貸而市無滯財則不刊之論矣自版克楮幣之制大興而其法降美遂使今之商情與古大異古惟斥母多者而後贏利厚乃今不然今有甲乙二商甲多財而乙寡二人治業各斥母財十萬甲之爲母悉出於家而乙之爲母則出於其家者僅二而出於賒貸者八焉賒貸之息值百納五至於歲終計贏各萬五千是甲以十萬出己之財獲萬五千之利而乙之母賒貸什

八其息四千。償是之餘得萬一千。然則甲以十萬贏萬五千。乙以二萬贏萬一千。夫萬五千之於十萬。百得十五之率也。萬一千之於二萬。百得五十七。有五之率也。噉而較之。乙之贏率。過甲贏率。蓋三倍不啻矣。多財之賈。何必善乎。此則古今商情之大異者也。要之鈔業之利。取通滯財。竊嘗謂滯財之致貧。其害烈於侈靡。昔者之印度。今日之中國。以庶富之國。而有貧乏之形者。害端在此。大之則國家之府庫。官司之度支。小之極於商賈之囊橐。閭閻之蓋藏。蓋無所往而非不生不息之積聚。而至國有興作調發。則又以甚重之息。漏卮於敵國外人。循是爲計。國焉有不大大困者乎。輒近十餘年。歐美諸邦。皆有積聚版克。積聚版克者。其受人寄賄而與之息也。其數極於其微。其時極於至暫。此所以勸小民之節蓄。而祛滯財之害。至於錙銖者也。往者小民有財。謂其數微。每不甚惜。則費之於不償之地。自積聚版克興。於是乎民樂畜聚。數稔之後。往往由窮窶而爲中產之家。既富方殺。風俗漸美。由是觀之。則版克者。不徒富國之至術。而教化之行寓之矣。後有君子起。

而施其政於中國。功不在后稷下也。豈特轉貧弱以爲富強也哉。

夫易事通功之始。貨以易貨已矣。降而後有易中。易中由粗而精。於是乎有三品之圖法。至於行鈔。則以然諾行。而通財輪設。至精至簡。不可以復加矣。雖然。其爲物取代三品而用者也。三品之行於國中。其量有所止。而不通。故代之行者。其數亦不可過量。而無窮。蘇格蘭之鈔。最下者名數二十先令。其幣施諸國中。常有定額。大抵以歲中交易所需此數之見財爲量。雖欲過此。所不能也。設不幸造鈔者不審其然。謂惟所欲爲而強過之。則得鈔之民。將立覺其過多而無用。轉之國中。則不容輪之四方。又不可彼將持是安歸乎。則有反之版克以求見財而已矣。得見財則可通於四方。此所以金集沓來。必盡其過量之鈔而後止。當是之時。使應者微示之以難。則來者愈疑。而索之愈亟。鈔業之億類如此矣。

經商之業。不能無費。屋肆有利。帳夥僱役有庸。舟車關梁有餽。有權其大較也。鈔業獨多者。一儲待支之鉅款。而亡其息利費一也。復俄空之囊橐。出齋資之子錢。費二

也行溢量之鈔則二者皆增而後費尤重何以明之行鈔溢量者其儲以待支之數比之不溢者不止比例爲增也既曰溢矣則出而輒歸前所謂以有待五者此所不能也亡息於儲峙者必多則前費重矣索交者亟則待者之囊橐雖富而旋虛其彌縫楮展轉取盈之爲用力常殆而無間則後費重矣且尤病者其待支之儲峙既煩而所支之見財又不留於國中而常若外注蓋其財乃以支溢量之鈔其在鈔既爲溢量之鈔斯在財亦爲溢量之財非國中所資以通轉百貨者也而見財爲物不居勢且輸之國外以求利故版克雖致之甚不易而其物乃常外注而不留外注之勢無窮而致者之力易竭則所謂展轉取盈之術將降而益難益殆而其費益奢故曰二者皆增後費尤重也

卽事爲喻今設一鈔業其所行鈔爲四萬鎊恰及國中受鈔之量則儲萬鎊以待支無竭蹶者乃浸假而欲行四萬四千之鈔其四千爲溢量出則輒歸於是所儲不止於比例爲增之萬一千必至於萬四千而後可以及事然則彼於四千鎊已亡息而

無所贏。且時時有調集四千見財儲以待支之勞費。是四千者。既集方散。不能留也。使操是業者。常明此理。則國中無溢量之鈔。而市廛亦安。惟其明此者希。而每爲其無所利而自損者。此鈔之所由溢。而國家亦受其敝也。往者英倫版克。坐是弊故。歷年籌款造幣。至八十萬鎊。泊百萬鎊之多。又緣其時國中通行金鎊。磨損虧重者多。故買金造錢。每翁斯價常四鎊。及成新幣。則每翁斯僅及三鎊十七先令十便士半。如此則造幣者常值百鎊三抑二五也。其造幣之數。既已宏大如彼。所失豈少也哉。雖泉局不取爐火之費。造幣衆。則國實受其虧。然於英倫版克究何補乎。蘇格蘭版克亦然。以行鈔溢額。應支難給。則置人倫敦。以調集見錢。費不啻百二百一五以下。既集則輦以致蘇。行巡保險之費。每百鎊加十五先令。其煩重如此。猶不給。則與倫敦之版克鈔商爲期。以取見錢。他日期熟。計息財。加中僧索償。又不能。則往往以期償期。額丁曰。拉倫敦之間。一叱勒常四五返。其中息債之遞加。一出於資者。蘇格蘭鈔商號謹慎持重。顧其中以溢鈔致敗。不乏人也。

故版克僥倖之多其厲皆階於溢鈔此可以尋源竟委而論者也自溢鈔既行之後
由前之說其常儲以待支索者必充不然且敗而無如鈔溢則其所支之見錢亦溢
故其物恒外洩注之以吹淪洩之以尾閭其勢非致竭不止矣每見如此之時民多
聚銷金幣范之成鎰施行異邦或即售版克以規厚利所聚銷者例選最新極重之
制幣蓋未離爲幣則新故輕重同值至幣銷成鎰不以枚而以重言斯二者之差數
覩矣往者英倫版克以儲支之急歲造新幣降以益多而國中通寶匱乏如故其摩
損輕薄亦過前事效相反常群訝而莫知其由又市中鎰輕則金鎰之價愈騰每翁
斯過於四鎰者有之其斂金造幣之費亦以彌鉅英倫版克所造幣於泉局者本以
自供儲峙應支需也而其勢乃以富姦利廣漏卮蘇格蘭諸鈔業以行鈔不審其受
罰已不輕矣而英倫鈔業受罰過之何則自受其罰之餘又代蘇之鈔業兼受其罰
故也

鈔之所以溢其源皆起於國中阻商輕剽逐利之故今夫版克以財貨商非曰爲之

出本亦非曰彼之本微而助之使鉅也不過俾有除貸應支之便而囊橐無滯財得用全力經營云耳使其不忘此義則鈔之所發必不逾國中制幣之數不逾制幣之數則出而利行必無浮溢氾濫之弊亦自無鈔出輒反之憂是故版克買期者除貸之變術也彼豫則給財而減之以應收之息至於期熟版克收回叱勒中所載全數而母子悉在其中此亦不過與之利便使不必儲財待期有所停滯其事與除貸異而未嘗異也而版克之儲時則如積水之壺池其出入二孔相敵不待勞挈壺者之智力而水常盈平焉所謂楮柱維持之煩費乎自有輕劑逐利之商藉除貸以爲其業之母財而鈔始溢鈔溢而前所指之弊端見而版克乃終受其殃故版克與人爲除貸務常責償入之以時常法爲期自三月以至八月於此期內償入者宜等於付出之數則除貸之事雖相引而長無患也假其常有通負而繼繩更除則其勢必至於危失譬之池水出鉅入微其勢非竭不止就令他術取盈其因始終不免爾

故蘇格蘭版克章程皆以所與爲貸之家時復其財爲最要否其人雖號饒財不國

貸也。蓋以時復所除貸之財，則版克緣此而收甚便者二，不止省其所謂第二費而已也。

所謂甚便二者：一曰審市情。夫私家以財貸人，而不欲其有失，則時時調資者生業之盛耗，爲作之當否，然其勢可及者，以其財之所寄，不過數家十數家已耳。至於版克鈔兩所與往還，動輒數百千家，業異人麗，烏從而盡察之？不察又常有失，而其業以危。惟資資者不逾時而復其所貸，而後一市之情，可不出戶而盡悉也。日展簿互稽，而其人生業之盛衰，爲作之當否，十八九如指掌矣。此其甚便一也。

一曰節溢鈔。蓋曰鈔溢者，鈔之爲數溢於國中所資爲通轉之見錢之數也。而見錢之數，又即諸商所儲以應非時支索之數。故使所除貸之鈔，僅使有應支之便，不使有無資之母財，則鈔之爲數將不逾於國之見錢，不逾於國之見錢，則其額無由溢而版克安矣。今使資者之復所除，應期按節散總相伴，由此可知其所資之財，乃以應支而未嘗以爲母，故曰資以時復鈔無由溢也。此其便有過於前而知之者鮮矣。

版克正業。所以使通國無滯財。過此則其業或失而危。故法不當以其財爲人循環之母。雖循環爲物。由貨而錢。由錢復貨。然而轉變雖速。尙不足以爲按節應期之償也。至於常住之母。愈不可以版克之財爲之。蓋常住之復。雖極利之業。常在數年而外。其萬不能應數月之限期明矣。今夫經商興業之家。母財固不盡由已出。然其稱貸必有所質。多財者據質斥母。出以貸人。而坐食其息。此則質假之正業。與無所質而爲通者。大有異矣。

案今日版克。亦爲據質斥母。出以貸人之事。此實兼兩業。不可覈也。

則是二十五年蘇格蘭諸版克行鈔。已極國中受鈔之量。而賈受無窮之益。而於版克無損。使其競競以持滿戒溢爲心。雖至今無弊可也。顧逐利常情。每以是爲未足。動則謂鈔而藏。在資人母本。其出納之廣狹。宜與市廛生計之擴充相副。要之彼所謂擴充者。非眞擴充也。居奇貪得之情。炎於中。而力不足以舉。又不能指眞產爲質。則盡於誑貸之可暫通。而不可久假者求之。求不能得。且不停後害。造僞盾以取之。

此買賣實空與夫造期之事所由昉也。夫經商之業至不幸而用造期則引鳩作脯取快目前其去僥敗之日不遠矣。此術英市久已行之而近者大陸戰事方殷一似指普魯士三十年之戰一行買多邀厚利於是用者愈多蘇格蘭母財既微商業較隘以貧國而行偽道其受害爲尤深矣。

案西人質劑粗分四種一交易單二鈔票三支條四借券。甲負乙財署券載所負若干行息幾許約某月日還此質劑之最簡者則借券也。寄財版克用則揭條取之是曰支條。版克之所行用以積代金則鈔票是已。而商業之中獨吡勒之用爲最鉅。吡勒此云交易單即中國商賈所用之期票也。單中用事例有三家出單者甲照單付款者乙及期受銀者丙其式如下。距今若干月日親取或憑押付某人丙銀若干其款收訖某月日某人^甲於某所立某人乙照付其及期受銀之丙得此單則以時送付款之乙令照驗若不誤乙則於單面斜簽其名曰某人受訖而乙從此爲受期付款之家有時甲丙同人亦無不可惟單中如不載憑押二字則

爲不可通轉之單必丙家自取而後付如載明憑押則丙只於單背署名此後單行市中及時憑單取銀與尋常楮幣無異是曰通著如不通著則丙於單背署名矣而並載所付丁家之名不以付戊仿此有時至數十家皆書隨背者通曰簽保迫期熟受期之乙付見銀此單作廢設乙不能則乙爲倒帳執單者限一日二十四鐘之內告簽保與出單諸家遞資所負一或不能皆爲僥敗此西人商業通例也如執單逾十二時不赴告與簽保出單者無涉矣

買空賣空之事商賈所熟知似可存而不論顧吾之爲書觀者未必盡商賈人且其事於國計民生效驗繁賾即在經商之家亦未必盡知其所以則晰而論之不容已也往在歐洲中古君上橫征暴取而未嘗爲民資然諸故商賈之民往往自成風氣二百年來新治日出政漸趨平則轉取賈人之規則章程脩之以爲理財之政今昔雖殊要皆視叱勒爲最謹禁欺實價議不旋踵假有三月之單期熟而認受者不能立付其業於時卽爲倒閉單經聲明負約乃終索之於出單之家如亦不能立還相

隨俱什。又設其期未滿之先。單經流轉。用以購貨取財。而各家署背簽保。遇有是事。簽保者轉相責通。如不立還。則亦爲倒。蓋吐勒限期甚短。故每有出單認受簽保三家。其財力久不爲人所任信。而人猶行用之者。利於其便。而冀幸其事之或不然也。此猶將傾之屋。而走避風雨者。猶仰一背之麻。曰此屋之傾。固也。然而何必今夕耶。假令額丁白拉有賈人甲。出單向倫敦賈人乙。期限兩月。付銀若干。乙之於甲。本無所負。然而願樂承受者。以豫約兩月未滿之先。乙得出單向甲。賣其付銀若干。同於甲單所支之數。且加息錢中倫焉。故樂爲也。夫吐勒者。以先有貨物之交判。而及期所取者。物之價也。今則本無貨物之懋遷。而亦爲此。故在出單者爲賣空。在認受者爲買空。其賈劑名曰方便吐勒。亦名造期之票。與真吐勒虛實懸矣。於是當第一期未熟之先。乙乃出單向甲。而甲又於第二期未熟之先。出單向乙。乙復爲此。於第三期大抵皆期兩月。出此入彼。絲延至數閱月者有之。至數歲者有之。而每單向甲之時。皆加息價。甲固出單之原主也。常法子錢值百加五。而每次僱費常不下一分五。

盤假使歲中往復六周則其息率不在每年八分以下抑且有時過之蓋當市情竭蹶則僧息二者同時並增故也邇來通行贏率以百中得六至百中得十爲歸使買者仰母財於前術而歲終課獲能既償所負之外又有贏利以酬其勞此不數邀之幸也然而鉅商賈常赤手入市操此累年不恤厚費彼固謂吾業所收之利不啻倍蓰爲酬及其究也如寐初覺大異所圖則蹶於中道者比比也

市有造期則版克受其敝卽如前事當甲乙造期之頃其旨本以求見財也故當甲出此方便叱勒向乙之時其叱勒必售於額丁白拉之版克用豫息而取見財及乙復出方便叱勒向甲之時必以售於倫敦之版克亦豫息而取見財矣凡此所謂見財者率皆額倫二地所行之楮幣雖云期熟二地版克得持叱勒索全數於認受者之家而無加第一期未熟之頃已先有第二期之豫息者來其數大於前數使版克於此暫而不爲彼認受者且無以待第一期之熟矣然則所謂第一期者造期甲與認受乙者實皆未嘗還也而皆還於版克之鈔而此如儲水之塘偕其一鑿之後繼

欲復之乃先更取其一鍾以爲復之之地且鍾之爲量降乃稍大循是以往有竭而已。

自有輕剽逐利之商用造期之術以具母財則版克本旨所謂使經營之家有餘貸應支之便不必別儲滯財者其事廢矣。鑿者英蘇兩境所行楮幣至多其時耕墾製造轉運諸公司有其母全由於此者其多也如此則國中受鈔之量自溢而前指種種之弊端紛然皆見民生國計悉被其殃然而彼輕剽逐利者之所爲其術至爲巧密往往不獨爲鈔商所不知抑且爲鈔商所不疑。

今使甲乙二家狼狽相倚互出方便叱勒而以豫息專售其期於一家之版克則歷時未久鈔商雖至瞶瞶亦將知甲乙所爲乃無本之業所待以經營者特吾所貸與者耳。顧甲乙不如是拙也其方便叱勒之所售者必不囿於一家而出單與認受者亦將不囿於二人彼且使多人者沿而爲之同利則相濟一時而聯十數家者有之矣此則尤不易察者也蓋造期者之所爲自其外而觀之固與真交易之叱勒無以

異異者存於先事之懋遷就令鈔商中道覺之往往覺之已遲所侵已鉅設斬於此億者必多而鈔商亦無由免則爲自全之計勢不得不虛與委蛇以力圖補救於其後明告前期未熟不復爲豫息買期之事使虛僞者日覺其難而設法於他途籌款抑別求他所版克以與爲通俾此一家無害或受害稍輕而已然使鈔商微露其難彼造期者勢且狼顧常以彼數家之竭蹶指爲一國貿易衰微或言市肆艱難版克出納之吝實致之然而版克固無罪也無論爲一業計抑爲一時之民生計彼版克之致謹出入有不得不然者

當彼事窮勢屈之時而蘇格蘭一新鈔商出其版克以接濟諸商爲主義（版克名得格利士公司以一千七百六十九年十一月興於蘇格蘭之愛爾延至一千七百七十二年六月歇業候支事後總計虧折共四十萬鎊有奇）用意甚美惜其闇於事理不察市廛所以涸竭之故徒操豐亨豫大之說而不知何道之從故於除貸豫息諸事一主於寬綽不苛其豫息買期無論虛實歸斯受之即至貸本治地收利最

迎而彼尤樂借資以爲有益國計。雖所出貨皆其楮幣。絕少見錢。但其鈔之行。頃刻逾額。所行雖廣。朝出暮歸。應支滋愆。其庫儲雖極力聚斂。未嘗或盈。始創之母以十六萬鎊爲額。集者十分之八。餘議以數番續收。而具母之家。於第一屆母財既交之後。又躬與本業爲賒貸。無異他商。故後番所交。名爲續收。實則先取其出納之際。既已寬假如是。華商競趨。雖極力掊聚。猶無以應也。事不得已。則惟躬與倫敦各版克造期。而後可以集事。蓋興未數月。而已循此必敗之轍矣。先是母財家田產。所指爲此業之資者。不下數百萬鎊。惟其財力優裕如此。故猶足以勉支二年。至於停業候支。通計出鈔二十萬鎊。倫敦各版克叱勒出者共六十萬。合計二年之間。其濟蘇商以本者共八十萬餘鎊。前之二十萬鎊。年以五分爲息。中去經營之費。則所贏也。而後之六十萬鎊。乃與倫敦版克造期。息倍兼之。則年八分之率也。故四分全母之三。皆值百折三云。

然則事後之所得。乃正反其始之所期。蓋彼謂民方競業。所少者財。得彼所爲。可期。

有濟。又欲取鈔商之利權而壟斷之。故盡反其謹約之爲。而出之以樂易。乃彼之所濟於諸商者。則亦暫耳。而卒之二年之後。所失彌奢。直不如其早已名爲愛之。適以害之。害不止於資貸二家。而國亦以耗。獨前此之版克。實受其益。使無此新者出而代受其敝。欲免於轉轆而不相隨俱仆。難矣。病所欲濟者。利所欲傾者。此商之所爲如此。

方其事之締造也。或謂出鈔貸商。皆有實質。則無論支索之勤。儲峙之亟。是所質者皆可轉之以爲應也。卒之履而後艱。知周轉之緩不及事。其始積既不豐。其外流又甚銳。欲其逮事。勢惟有交倫敦之版克造期。而後見財可得。願雖勉與支持。而每有造期。必受大損。此與買空賣空之商異。而實未嘗異也。所出之鈔。反而不留。利於何有。而每次造期。貸銀一切覓主。割券會合。交質之費。皆貸者之損也。雖若至微。積且以鉅。矧乎其非微也。此猶挈壺氏水時時流。盈之無術。乃倩人持斗具車。調於遠岸之井。幾何其不蹶也。

前術之無所利而不可行如此。顧即使其術可行。而於行者有大利。而其於國財無所利而大害。又灼然可知也。蓋楮幣可代財。而不可爲財之實。故彼之所爲。於通國母財爲無益。不外變鈔商爲通國稱貸母本之公司。欲舉債者不之私家而之鈔商。然私家界人以財。例不出數十數人而止。則於其人之才行智力。皆所深知。而版克所與交者。動數百家。視然諾契微爲往來。必不如私家之審慎。且強半皆挾持空質。周流剽補之徒。其力小而圖大。則多敗衄而少成功。其事勞而費奢。則無贏利而常折閱。此其給養勞民之力。所以日促也。私家之所貸者。則不然。其事雖不若前者之閱壯。而守約踐實。歲計有餘。故其養工之力日舒。夫國之所以求多母財者。無他。爲養民耳。而二者之殊如此。故就令前術可行。亦不過取私家之貸者。以歸鈔商。徒見其害。未見其利也。

昔有賈利之家。名羅約翰者。閱蘇格蘭之貧困。坐母財墮而民功不興。倡爲通民鈔業之制。欲令所行之鈔。與全蘇土地之價值相等。以此懸蘇之議院。議院壯其策而

不敢行。當是時鄂里安獨克適攝法蘭西朝政。見則議而行之。此所謂密昔斯皮財政。至今猶在人口耳者也。其宗旨非他。以爲鈔權者上之所操。可行之於無窮而已。其說壯侈詭奇。自民知理財以來所未曾有者也。法士都托德著商政錄。論其事。而圖華尼考其始末尤昭晰。無俟不佞贅言。先是羅載其說爲書。行於蘇。其中瑰瑋之論。讀之令人自失。顧辨澤矣。而頗謬事情。是用卒底於敗。前所謂得格利士版克者。亦誤於其說者也。

案羅約翰·蘇格蘭人。生於一千六百七十一年。父爲鈔商。少年圖很殺人。避罪走歐洲。飲博無業。時時以鈔策干時主。至一千六百七十六年。用於法。創總銀號。其鈔大行。又說法王以美洲之盧夷鮮那諸部爲殖民地。大開商業集公司。而法之印度支那非洲諸商業。皆爲所兼并。財政悉歸羅一人掌握矣。是時國用驟舒。一千七百二十年爲主藏官。五月以鈔溢敗。家產沒官。屏逐出國。而俄王大彼得得猶招之。欲使治財賦。羅辭焉。後僑伴英義間。以一千七百二十九年死於義之威匿。

斯論曰吾讀史至鼂錯言爵者上之所擅出於口而無窮粟者民之所種生於地而不乏未嘗不歎後世人主之所以輕用名器橫征民力者錯此言禍之也彼羅約翰之用鈔何以異此往者奈端之學不明人昧全力恆住之理於是有欲爲恆動機者今則五尺童子知其不可矣彼鼂錯羅約翰皆欲爲恆動機者也治平之道始於格物不其信歟

英倫版克者歐洲財幣所輻湊者也一千六百九十四年七月二十七日議院合辭以聖書冊立之皆是時英國家舉債一百二十萬鎊歲息十萬其版克經理之費四千而九萬六千爲出財者息蓋其時朝廷新建民心猶疑故所舉債息重如此越三年版克增母一百萬一千一百七十一鎊十先令合前數爲母二百二十萬一千一百七十一鎊十先令而鈔乃愈通至一千七百八年納太府者四十萬鎊而其息如故知基屬稍牢爲民所任故其息不過百六與民間舉債等矣繼而國家又有所資而版克亦哀增母財蓋至一千七百一十年總計五百五十五萬九千九百九十五

鎊十四先令八便士。而國債則三百三十七萬五千二十七鎊十七先令十便士半也。至若耳治立之三年。更納太府二百萬。一千七百二十二年收南海公司券四兆。而增母三百四十萬。都八百九十五萬九千九百九十五鎊十四先令八便士。行鈔九百三十七萬五千二十七鎊十七先令十便士半。蓋行鈔始過其母矣。迨一千七百四十六年。計母一千七十八萬鎊。而國債及行國中者。總一千一百六十八萬六千八百鎊。至於今猶如此。若耳治第三之四載。以更定冊書。所獻於國者一十一萬鎊也。

案乾隆末年。法國拿破崙破命。盡倚英之策。其時英倫上下皇皇。君民相救。於是英倫版克許以三百萬鎊。輸助國費。不收子錢。至一千八百三十三年而止。光緒初年。國家債者已三百萬有奇。其國債猶餘一千一百一萬五千一百鎊。而歲息則百三云。

國鈔業具母執券主人。分利歲有高下。視國債所收息財。及他關涉者。以爲斷。國債

息高者歲百八下者歲百三而版克券息以百五半行者蓋累年也

必其所貸於國者皆亡而後有虧折之事故英倫國鈔業之安固不傾其勢與英之國家等議院不得更立新業其他小業新立者股主不得過六人皆載盟府者故其物爲國之大器不僅區區鈔商也國債子錢之聚散受之國施之民府藏契券之流通田穀諸賦先代納而後接收皆其業之事也故有時以挹注故行鈔稍溢額雖主者深知之不得已矣至於商賈之事其豫息除貸與他版克同英之大商泊日耳曼荷蘭之巨賈恃其緩急時至於百萬鎊之多然亦有時而困乃以零瑣銀幣應支大數以爲緩緩待轉之圖特不數見耳

國有鈔業極王者之智計不能轉無爲有亦不能益寡爲多爲之得其術不過使無用者有用使不生者能生耳無鈔業則經商者儲待用之滯財有鈔業與之爲通前之滯者皆可不滯而爲母或爲物材或爲器資或爲餽廩而皆有生財之效三品者通財之輪轂也而商賈儲之以爲見財得此而後地利之所出人力之所生其俵散

於民者無望。然三品亦滯而不生者耳。是故一國之財。其中常有大大分爲之息幣。自鈔業興而治之得其術。易三品以楮幣質劑。夫而後滯而不生者。皆通而能生矣。是故三品之於國也。猶之徑陌塗術焉。有之而後野之所生國之所業者。周流而無壅。而徑陌塗術之內。未嘗長一莖苗一穗也。雖然。其無所生固也。而非有之。又必蕩平坦直焉。必不可也。故王者識圖法。而鈔業之楮幣。則棄尋常之道路。而駕空爲複道。御風爲飛車者也。通之事自若。且益疾。而向之徑陌塗術。皆可加鑊鋸爲吠歔。則生者滋多矣。雖然。有其利者。又未嘗無其害也。無行地神矣。而絕迹者。又未嘗不危也。故鈔之爲業。不僅不得其術者之未或不敗也。就令致謹而爲之。亦有時焉。禍發於所慮之外。雖有智巧。未如之何也已。

假使國受外侵。而都會失守。夫都會固鈔業之所在。而鈔業又三品之所儲也。一旦蒼黃。悉歸敵有。則國之楮幣。皆爲空券。其糾紛錯亂。較之無鈔而用三品者。相去懸矣。貿易之事。無以爲中。賦稅所存。半皆實鈔。神京易主。所持者舉不足以爲軍興兵

食之資則較之用三品而未嘗行鈔者光復愈難故有國之主欲其地之可保抑其地之或失而易復不獨宜令行鈔不得溢額已也又當使國中通財輪穀用鈔者不得過多則亦思患豫防之一端云爾

案斯密氏此言出於乾隆中葉而當時歐洲內地各國所爲常冒其所切誡者故法蘭西革命拿破侖力征諸邦民生塗炭而元氣不甦者幾五十年當是時英以島國自完其間坐享厚利窩得祿兵威之震則亦財力之有餘也又嘉道間德人理斯特嘗發憤而論理財於斯密氏之說多所出入而所大聲疾呼則誠洲中人勿戰令英國利權坐大而已至今英人哆口動目輒言商戰夸海權而其實非英之自致皆歐洲各國使之然也古者六國紛爭秦人得蓄其全力以制天下近者甲午之役東亞之勢坐以魚爛古今東西世局若重規矩如此列強林立之世勞於戰守者皆善內政而不輕言戰者之資也區區制鈔抑末耳

鈔之可以酌盈劑虛者以國幣所通常有二塗之故有行貨與行貨者之通有行貨

與用貨者之通。今夫或爲金、或爲楮，行貨與用貨者所通之財幣固未嘗或殊也。然以日用之各有所急需，故同時所儲之財異物，在市之貨，商賈之所供，與民所分購而用者，其值等耳。顧貨之轉於商賈者其聚，而貨之銷於國民者其散也。貨聚者值亦聚，貨散者值亦散，故所通者多完幣重寶，散故所通者多輕品小圓。編戶之家，淺糶米鹽，日用所不可無者，皆甚輕之品。若先令、若便士、若半便士，其最急者也。且輕幣流轉之疾，什伯重者，故先令之流轉疾於幾尼，而半便士之流轉又疾於先令也。夫貨萃通國之所雜求，與商賈之所總供者正等，而其中交易之事，用無多之泉幣而已周。蓋品輕而流轉甚疾，一枚之用當數枚也。

案通幣分二塗。此斯密氏所獨明而關繫者鉅。所謂商與商通，又有本國異邦之分。大抵銀市之變，起於本國商群者爲最多，而異邦商業變動則多由用準不齊、朝暮騰跌之故。至於民間通行錢鈔，時有望通，則由市井制錢之多寡，三者其原各異，言計者所宜分別者也。

審此則知所以酌劑楮幣之術矣。蓋制鈔輕重大小不同，能使之僅通於行貨者之家，抑兼通於川貨者之衆也。今日倫敦之鈔，皆十鎊以上，故其用多在行貨之商賈。常民得一十鎊之鈔，欲購五先令之物，則須出而易之。然則此鈔用者方四十之一，其物已歸於行貨者之手矣。蘇格蘭行一鎊之鈔，則編民家而有之，往者有十先令五先令之鈔，則楮幣盈市廛間。北美初鑄鈔，有一先令者，英國之約克沙有半先令者，則交易之事，無往非鈔，而三品益寥寥爾。

楮幣名數小輕如此，則治鈔業者不必多財，嗜利窮子皆爭爲之。其人署五鎊一鎊之券，持以入市，莫或受之。及以一先令若六便士散而行之，則受者無爲斷斷矣。然其勢必多敗負，且所負者多貧賤小民，則於國有大害。不僅小小不便也，故爲規中制，宜令鈔行無下五鎊者。此在吾蘇則將與倫敦之十鎊者同功，而前指之弊可以免矣。

案英倫版克於前祺行十鎊五鎊二鎊之鈔，至一千八百四十四年，則議院禁五

商之舉動必率由議院之所定而後行也。

夫舊楮以爲財而署者之財力爲民之所任。又無論何時持請真幣皆有以應而不虛。則其物固與真幣等。而物之以是易者其貴賤亦當與以三品易者同也。乃或謂國之泉幣得鈔忽多財多而物產如故則物價將貴於其初。驟聆其言似若可信。不知鈔之所益彼金銀之去而他用者如之則物價無山貴也。蘇之穀價以一千七百五十九年爲最賤。當此時鈔之行者獨多。而自前祺初年迄於今日穀價未嘗更賤。英蘇二境鈔業衆寡今昔不同而穀價之比例相若。英多楮幣法乃無之而英之麥價同法。至如休蒙所捐糧食極貴之二年則天時之爲以與鈔業之多適相合耳。烏可援爲證論乎。

至於私家所署之諸券則大不然。蓋鈔之所以無異見財者以隨時可轉故也。至於諸券或署者成約不同或守者事情中變或年限未至券不可宣而此時又無所得息如是之楮雖亦名財其所值自與真財迥別。特其相差之數則亦視情事難易則

限遲速之不同。而因爲高下耳。

數年前蘇格蘭版克每於所發鈔票別加標識。或見票即支。或及期始付。則則按加息利。行而漸濫。致有鈔者大抵不能即得見錢。行之市間。遂以折減。嗣議院倡禁半鎊及五先令鈔。同時並禁鈔中不得另加標識。於是並蘇鈔值始平。而民便之。約克沙行極瑣之鈔。有六便士者。民欲持至索償。則須積至一幾尼之數。而後總付。於是市間亦折用之。嗣英議院禁之。而并廢二十先令以下之鈔。

北美英之屬國也。其行鈔與英異制。政府設局頒鈔。令民行用。同爲法償。約若干年後始可轉真。而是若干年者。又空行無息。雖官局堅固不傾。然以通行歲百息六計之。十五年百鎊之息。則四十鎊也。國而奪此於民。雖亞洲專制之治。其取民無藝。不如是矣。故論者以爲攘奪之政。殆無以自解於人言也。又彭斯爾花尼亞政府於一千七百二十二年行鈔。患民折扣。則著令用鈔而與真幣法償歧視者。罰作之。亦暴政也。然其令無效者。蓋國家苟不顧理義。強取於民。即以一先令爲一幾尼。蔑不可

者。上有所負。以是償之。民雖狼顧。無如何也。特欲使民持一幾尼之貨入市。索以償。一先令者。卽峻法痛緝。不能得此矣。常是時英倫貨幣行美洲者。於英百者。於美乃百三十至千一百不等。視其地行鈔衆寡。與轉真年歲遠近爲差。而本國議院。令屬國鈔入英者。皆不得爲法償。固其所矣。而屬國輒訾其不公。何耶。

彭斯爾政府出鈔。視他部爲持重。故以抵通行金銀。未嘗折減。然亦有術。官局未出鈔。先令國中諸見錢。皆故昂其值。往日五先令者。作六先令三便士。俄而增至六先令八便士。故雖未行鈔。而用真幣。其地之所名。已減什三。鈔之所折。罕過此數者。不折於鈔。先折於錢。是不折猶折也。方其令國中增昂錢值也。當軸意謂。如此則鈔行之後。金銀泉幣。不至外輪。輪之將虧折。獨不悟從此外來貨物。皆將與泉幣之所昂者。比例增價。則外輪如故矣。此真物情常同。而人意自變者也。

屬國之鈔。許民用之以納征徭。完賦稅。無所減。與初名者同科。則其鈔雖不可卽轉。然亦不廢。惟所頒之鈔。其數過征徭糧稅之數者。則其值又不能不比例折矣。今使

爲民上者行不轉之鈔而定民之納稅必得幾分爲鈔布此令者常能使鈔值轉高又使造鈔之局其出鈔之數常不及其納稅者則鈔值之逾真幣與所不及者比例荷蘭國鈔以兌換金銀多者常百四五名曰亞驛其故以此然其事於國計無益也鈔制多端漲折互有顧鈔自變耳於百貨相待之情無能變者故每緣鈔賤物價或昂人乃驟駭此兒童之見也大抵金銀之貴賤而物價因之有低昂者一視礦產之肥磽入市之多寡二視人功之奢約轉輸之便難二者之外物值無由變也

鈔商造幣有節而應支信則國家可一任其所爲無動爲大擾斯害矣輒近三島之內版克如林而起民或相驚而商業反以益安蓋同業日多則經營者益慎長慮却顧不能行溢額之鈔而常防全集之支索由是造期者寡而商有垣域分之既衆而獨任者輕即有僥閑所波及者狹又以競者之衆也故商賈之賒貸滋無難而息率趨薄若夫通功易事果一業利民則宜縱令自由廣其競趨而後風氣日上者固不僅鈔業一端然也

案斯密氏之言鈔也。其所指使民利用之由。若專專於其物之不費者。雖然。此不足以盡鈔之美也。治化之天演日深。商群之懋遷日廣。易中爲物。欲專用三品之泉幣而不能。多則滯重。難以轉輸。一也。秤量計數。繁瑣啓姦。二也。藏棄不周。動輒誣盜。三也。凡此皆三品泉幣之所短矣。是以東西二洲。不謀而合。場市略廣。貨殖自生。蓋即使楮金二物。製費維均。民猶舍金從楮也。又有便者。楮幣製發多寡。可以應時而立具。通商盛大之區。貿易進退如潮汐。然其有待於易中也。時急時緩。三品之幣。鑄造需時。使市業必待此而後通。則常不及之勢也。往者北美諸部。常以其地鈔業之有無。爲商業所向背。往往以創立稍遲。坐失大利。理嘉圖曰。鈔者易中之極則。但使爲制信而操縱得其術。舉國行鈔。民乃愈休。蓋鈔之所可慮者。二端。而大抵皆形於差數。一曰用方亟而少發之。則鈔之值將過於所名。一曰徒行用而不可轉。則鈔之值必劣於所名者。二皆病民。而其後尤劇。故其擬英倫版克章程。謂宜定制民持一翁斯法金易鈔。常得三鎊十七先令。不得勒勿予。而持

鈔易真者。版克金鎊即少。得以金錠兌付。按泉局所定銜色。一每翁斯值三鎊十七先令十便士半。與買入者稍別。一與之。如此則鈔常足用。而亦無溢額時矣。理言如此。後有議鈔者。可鑒觀焉。

又案今天下無真易中。理嘉圖謂鈔爲易中極則。然鈔必準金以行。而金之本值無定。至於銀爲本位。愈難言矣。中國今日易中之患最烈。且無及其餘。但以田賦官祿言之。則可見矣。夫忠信重祿。所以勸士。國未有祿不足以恤其私。而可責人以廉潔奉職者。至其人以他道自輔。吏治尙可問耶。彼西人言我內政。咸謂中國官吏無廉恥。嘻笑唾罵無不至。嗚呼。豈真中國有貪泉耶。國家沿元明制祿。時殊世異。已五百年。而用其易中不改。故以詔稍言。使今日仕者而廉。必非人而後可耳。然則居今而言治理。不自更定田賦官祿始者。雖聖者爲之。猶無裨也。英計學家斯古略言。易中求無變者必不可得。然時時知其升降舒蹙之度。而謹劑之。則道國者所不可不問者也。其術取國中百產。每歲平價。列之爲表。十年以往。前

後相方。易中之情。可以粗得。爲之既久。至於曲線可推。而後據之以定田賦官祿。與易中進退相衡。田賦官祿既定。則其他度支。皆可比例升降。嗚呼。此真今世當務之急也。

篇三

論人功有生利有不生利

舉世皆勞。而收效各異。有致力於物。而物值以增。有用力雖勤。而無後效。前曰能生之功。後曰不生之功。今如製造之夫。以其功力。被於物材。成器之後。其值遂長。已之生業以進。主人之贏利以多。皆生利者也。至於便辟使令之人。其勞亦至。而功不被物。去而無跡。是不生利者也。工師廠主。出財雇傭。其財無損。過時而復。且有贏利。便辟使令之功。雖勞無所復也。人以多雇工傭而富。而以多畜便辟使令之人而貧。其明驗矣。雖然。必謂使令者爲無功。抑其功爲無所值。則不可。是故其受餼廩與生利者同。獨製作者被其功於有形。可以轉售交易。其成物歷時甚久。猶存人間。今者以

功成物他日由物又轉爲功二者之量常若相等至於使令者之功固匪所寄則莫可轉事竟力消不可得復

由斯言之則所謂不生之功不僅使辟使令之賤者已也王侯君公降至執法司理之官吏稱戈擐甲之武夫皆此屬矣夫國之設官治兵實以云乎實皆在公之隸而仰食於生利之民者也非不知其業之可貴亦非不知其人之不可無而謂其功存有形食而無耗則不然矣彼之所職者一國之治平民生之安集也然而今年之治平安集不可轉爲明年之治平安集也其去而無跡乃與前之所謂使辟使令者同科品上者若官吏師儒若醫巫若文章之士品下者若倡優侏儒鬪力走馬其功雖貴賤迥殊輕重各異而皆去不復留當生即毀則皆不生利而致貧者矣

案斯密此言大爲後賢所聚訟徒尙有形之利而不數無形之利知民力之生財而不察民德民智之有關於生財尤鉅於義似爲未安然其言蓋有爲而發二百年以往歐洲竭國財耗民力者大害在武人教師處貴位尊勢食祿主優而於群

無補。苟諒其心。孰謂其言無當耶。不然。斯密豈不知國治而後可富。理明而後功審也哉。

總一國之民。無論或勞力或不勞力。勞力矣。或生利或不生利。其待養於地之所產。民之所出。則均。願一國歲殖。只有此數。惟其養徒食者數寡。而後賸能生者數多。能生者數多。而後國之所殖。乃歲進。彼一畝之中地之所自生者。微論已。至於其餘。則固勞力而爲生利之功者之所出也。

國之歲殖。雖以其終事言之。不外贍民衣食與益費財而已。而方其乍殖之初。則其用大抵有二。一曰補復母財。或聚糧食。或鳩物料。或庀器用。缺者補之。舊者新之。此其最鉅也。一曰分給息租。息者。役財興業者之所得也。租者。斥地殖作者之所收也。其爲分於農功最易見。每歲秋成。其母治田者取其大分。以復其前費之母。而其餘利則息利與夫有土者之租。農旣如此。工亦有焉。成貨入市。其得利之大分。乃以復母。其次則息利也。

總此歲殖其補復母財者常仍爲母財之用頒餽慶具物料皆以贍生利之功者也至於分給息租之一分則或養生利或養不生利之功難以定矣人有財產而斥其多寡以爲母財者無不企其復而更益贏利也故其所養必皆生利之功在彼則爲母財在勞力者則爲歲進如所養者爲不生利之手指則其財不名爲母而爲即享即用之支費

不事事之民不生利之功因皆仰給於歲殖其給之也或在分借息租之歲進或即在補復之母財蓋母財所以贍工而工者取資衣食之餘亦或費於不生利者今如畜參奴厮不必有地之世家役財之鉅賈也庠俊之匠固亦爲之或以爲作劇觀伎之資或以納狗馬於醵之稅二者雖有濫侈急公之殊而以資不生利者一也惟既曰補復母財則必先爲生利之用而後有以及不生利者之家勞力者之得財以供諸費也必其力之既盡業之既成而後能之且其數常不吝勞力者衣食日用之外所餘固有限也然而中工以上常有少餘故其供賦也數微而積多則亦可恃也總

之不生利之功之所得待於分償息租者多待於補復母財者少息租所贍多不急者故可出入於生利不生利二者之間而人意常樂出於不生利之一途接陌連阡之主歌舜之樂俳優之笑不絕於前素封豪賈之家車騎之都實從之游無間於日則知租息二者費於無所復者多矣

案由此觀之則國家責賦於民必有滋矣國中貧民少而食力者多必其一歲之人有以資口體供事畜而有餘而後有以歸國課使勞力者之所得儼然僅足以贍生則雖桑孔之心計秦隋之刑威適足辟亂而已矣故曰民不畏賦在使之出重而輕

是故欲知國中民功生利與不生利二者之比例就每歲國殖補復母財與分給息租二者之比例其比例率富國之於貧國有懸殊者譬如今日歐洲富國其土地歲殖大半皆以復母財而其餘乃分償田主之租與治田者之財息往古小侯衆建各私其地之時田事斥母不多以少半復則爲已足其所謂田費者不過數頭贏者縱

之不治之地。飼以不穀之芻。況此區區。亦多田主之所界。則舉地所出。皆田主之息租矣。耕者多地主之奴僕。身家產業。舉非已有。時平則爲役屬。戰爭則爲卒徒。古之農事如此。今歐洲田主所收。無過三四分之一者。而田野治闢。地產日優。卽此四分之一之收。過古常三四倍。蓋農功日進。故其率日減。而其實能日增如此也。

案羅哲斯云。前文所言。稍乖事實。考之英國。去今五百年前。農料與田價相比。約三之於一。及今反是。農之用母。與田價相比。殆一之於三。蓋田功進而地力優。事固宜爾。至於歐洲田租增古。則五六十倍。而所收麥及他穀。不過方古九倍。則斯密所謂率減而實增。亦失考也。大抵英之地產。殆七倍於五百年前。而田租之增。則比例爲進也。

至於商賈之業。在歐洲繁富諸部。其用母亦於古爲多。古者商織工。陋需母固微。而贏率或厚。考當時息率。什一則贏者必甚充。而後有以償此。至於今日。中富之國。息率無過百六者。而尤富厚者。則自百四至百二不等。故商利雖厚。其用母財亦鉅。非

若前者之母輕而利重也。

案謂古之贏率必充。以其時息大之故。則須證古之經商皆貸母爲之。而後可否。則一時息大。不足以云贏率與俱優也。息率之大。生於二故。一視貸資二家之民數相待之多寡。二視其當時民信之何如。與贏率不相涉也。

故富國之歲殖。用之以補復母財者。過於分給息租之數。其比例既大。而爲數亦多。故其歲殖以養生利之功者。亦過於以養不生利者。蓋使養不生者多。則必分給息租之數先大。非不知分給息租之財。於二者之養。不必有所擇。然以養不生利者數終多也。

今若取其簡而易明。則試謂補復母財之款爲母財。謂分給息租之款爲支費。則母財支費二者相待之比例。大爲民風勤惰敦薄之所關。譬如吾英。今日之民。勤於昔者。緣今日國財。匱之爲母。以贖勞民者。多於三百年以往也。三百年以往之民。勞而無獲。乃多惰游。其言曰。與其作苦而無獲。不若嬉戲而無餘。大抵工商業廣之區。其

民皆母財之所瞻顧。故其用力恆勤。而志存夫求進。酣嬉飲博。自以日銷。英與荷蘭之民。多如此者。設其地爲都會。而爲王侯甲第之所州處。養小民者。不在母財。而在資族貴人之支費。則其民皆窳惰。生美衣豐食。而無積聚。如義之羅馬。法之華賽爾。康邊尼。方得不洛諸郡。是已。法之幕府諸郡。一此係當日國制與今絕異。一司理居之。爲訟獄之所輻湊。小民生計。仰於官吏。與赴愬者之支費。其民乃佚而貧矣。惟鄂盧恩。薩爾多。二郡。以地勢形便。爲商賈要區。其民稍異。鄂盧恩者。巴黎門戶。受外來之百貨。薩爾多者。法南歲醴之所聚。前者內輸。後者外轉也。其所便如此。故商賈就之。而民業興。他如巴黎。如班京之馬得立。如澳京之維也納。民風皆澆矣。歐洲京邑。若倫敦。若力斯彭。若葛彭赫根。爲都會。而其民不偷者。亦以所處最優。舟車走天下。百貨所轉輸。故其效能如此。至他京師。雖有商賈。所通轉者。不外本邑之所銷售。欲斥母經營其地。令如製造處。所物產行天下。難矣。無他。民性難用。訖也。英蘇未合之前。額丁白拉非。製造商賈之邑也。自議院廢。國之王公貴人。不居其地。而後民業稍

稍興焉。而法司權部猶在。故民勤不及格拉斯高。一格拉斯高於千八百八十年上計富庶。次倫敦。一嘗見大鄉之民。於農工之業已甚進矣。嗣一公侯貴人。起宅移住其中。鄉之民業乃復就耗。而編戶貧窶如初。由此觀之。欲知一地居民之勤惰。察其生計之仰於母財支費二者之孰多足矣。仰母財者民興。仰費者民窳。民窳則生利之業自微。生利業微。則歲殖日退。而庶富之象。寢以衰矣。

一國母財之增。必由儉。其損也。則由豪侈與妄爲。所以曰由儉而不曰由勤者。蓋民雖必勤而後儉有所施。然使徒勤不儉。其增無由。故儉者增之切因。而其先之勤與否。可勿論也。今有人於此。節一己之支費。而益之於母財。是母財者。彼自用之以勤生利之功可也。或以資人使畜生利之功亦可。前之所爲。則收其全贏。後之所爲。則分其財息。夫一人母財之增。舍節用無由得。則知一國母財之進。非衆民之儉約莫由來。

案穆勒約翰曰。凡母財。非節用。其物不生。非斥之以規後利。其用不著。故其界說

一 講書院印
曰母財者節用成積而用之以規後利者也雖然一國之富不必盡爲母財也必有蓋藏以待非常之費

是故惟儉有以獎勤蓋儉而後母增母增而後勤者有所藉手而致力以其有所致力而勤民乃以日多一國之地產由生轉熟所殖日優由此勞力之民多而不塞由此

案由此言之則富庶之源皆發於儉矣然計學家則謂民增之限視食而庶之爲量又視日用飲食所謂民質之崇卑使民質崇則過庶不易而所患或稀若民質甚卑則過庶易成而所患衆矣徒儉非不足以救之也民儉之患如此此又當與前說參觀者也

每歲之所蠲其耗而不留固也乃每歲之所蓄亦耗而無遺其耗一也特耗之之民異耳今如富家之支費或以待賓客或以養僮奴誠食焉而無所復乃即斥所蓄以規後利而既斥爲母之後亦欲無耗不能而耗之之人大異若傭工若匠師若將作

皆耗者也。惟耗盡之後，復其母於所成，而虛利附之耳。故節蓄之家，歲有所餘，以爲母，以養勞力生利之功。其所養不備，當歲之業已也。一養之後，歲歲無窮。母轉爲貨，貨復轉母。且此不必國有刑憲，工有盟約，以開其爲此禁其爲彼也。利實顯然，民自守之而不變也。是故財一爲母之後，其繼今所養必皆生利之功，而永永無絕者，自然之勢也。

至於不終爲母者，亦有之矣。豪縱之家，歲入不足，則蝕其母。蝕母則移生利之財，以從其不生利者。蝕者其母，遂並其所生之子而亡之。於是歲產以微，而國財坐減。故一國之豪侈，使無節蓄之民，以與之相掇，勢將奪勞民之食，以贖無所出之情。民其敝不止自貧而已。浸假必貧其國。縱豪家所糜，舉非外來，而皆爲其國之本產。其有害於一國之母財，而使生利之民失養者一也。蓋母財既虧，則必奪生利者之食，以贖無益之功。生利之民日寡，則國之歲殖亦微者，勢也。議者謂豪侈所銷，非外貨而本產，則金銀不出境，貨雖銷，而金銀仍留於國，故爲無損。不知使此財不耗於無益，

之功而以養生利者彼將復歸於成物而贏利附之金銀之不出境同而已費之財變其形而猶在不見少而加多前者一而後者二夫豈豪侈者之所敢望乎

且使國之歲殖日微則所謂仍留於國之金銀其勢亦不可久也夫金銀者通轉百貨之易中得此而後散樂售予欲得農工商所出之交易便也是故一國易中之多寡常以轉農工商所出之多寡爲歸不能遠過亦不能甚不及顧所轉之貨烏從來乎非其土地人民之所自殖則必殖之於外邦易以本產而得者然則國之歲殖微者其所轉之貨必與俱微所用易中亦以減少而舊有之金銀有曠不用者矣然此曠不用之金銀不終曠也主者必將役之以求利求利而國中無所用之則雖嚴刑峻典禁勿外流彼必輸之外邦而致本國可銷之物歲殖所不足者幾何此金銀之外流者必與之同其值當其盛旺出內產所有餘以易外邦之財幣及其衰耗則出財易貨以補所得銷者故非金銀出境而後國貧乃因貧而後有金銀出境之事出境者所以救貧也但歲殖不增則金銀之能救者亦無幾耳

富而進盛之國其農工商之歲殖日多多則所得以爲通轉之易中亦進其勢必祛歲殖之一分以取易中無論何所有金銀皆其所與易貨者矣惟國富而後金銀歸之非金銀多而後國富也夫金銀之價大地一耳礦工有衣食轉運有舟車更費之餘必益之以贏率凡國能具價而需某物則微論產於何地其物自來此不關金銀抑他物也使其國不需是物是謂綴旒綴旒而久不去者未之有也

是故國富之實存乎歲殖而世俗淺夫則指其中所用之黃白究之無間爲此爲彼其豪侈者日爲貧國之事爲群之仇讐其節儉者日有富國之功爲群之父母意不必存而功效自爾不易之理也

案道家以儉爲寶豈不然哉乃今日時務之士反惡其說而譏排之吾不知其所據之何理也斯密言儉者群之父母雖然但儉不足以當之也所貴乎儉者儉將以有所養儉將以有所生也使不養不生則財之蠹賊而已烏能有富國足民之效乎或又云奢實自損而有裨民業此目論也奢者之所裨裨於受惠之數家而

已。至於合一群而論之。則財耗而不復。必竭之道也。雖然。一家之用財。欲立之程。謂必如是。而後於群爲無損。則至難定也。於此國爲小費者。於彼可爲窮奢。法之巴斯德。英之耶方斯。皆論之矣。大抵國於天地。耗民財以養不生利之功者。蓋亦有所不得已。奇技淫巧。峻宇雕牆。恆舞酣歌。服妖婦飾。此可已者也。而兵刑之設。官師之隸。則不可無者也。使其無之。將長亂而所喪滋多。吾聞天演家之言曰。民德猶下。邦治云遙。其不生之功必衆。而民生從以不舒。今夫各國歲糜萬萬。張海軍而治陸師者。大抵欲自爲其無道。而禁人之無道耳。司李之官。歲祿最厚。督工之俸。優於執功。凡此皆民德之不可恃。而侵欺者繁致之也。使其不然。則省之以厚民生者。豈不鉅乎。雖然。兵刑官師之必不可廢。固也。而必立爲之制。於國之四民。賤其三而貴其一。使一國之聰明才力。不爭出於生利養民之農工商。而皆出於耗財治民之士大夫。而又難完而不精。濫多而無用。使前言而信。其國之日趨於貧弱且亂。非其所歟。且夫兵廣不精。其害尤烈。此學操兵而業殺人者。固皆操

耒耜而業食人者也。一云募兵則使生者貧寡食者益衆已甚病矣。然猶曰此所以衛生民而保積聚者也。而今日之兵其衛生民保積聚又何如乎。時平則糜糧餉。臨事則乏軍興。事後又有兵費之賄饋。哀哀下民。遭此天罰。竊以爲國之額兵宜居小數。蓋今日軍旅之事。難在訓將。不在練兵。誠使軍制齊均。將由學問。則臨事之時。因可化一以爲十也。使其不然。多乃益弊。一挫之餘。不可收拾。徒竭國力。復何益乎。

前謂損國母財。在豪侈妄爲二者。夫豪侈之害。既如彼矣。若乃妄爲者之害。母財與豪侈者常無異也。其智之不周。其功之不濟。若田農礦功。漁務泊夫他工。賈之業。坐是敗者。皆足以耗國財。而令生利之功。匪所養也。雖此數者之用財。必皆耗於生利者之衆。而因其鹵莽。利未由復。抑復之減前。則日月之後。國之母本。浸微浸亡。故曰害與豪侈者無異也。

廣土衆民之國。基局既牢。雖有豪侈妄爲之民。其害常伏而難見。夫樂由勤儉以求

善其生者民之恆情也。前者之所損常不敵後者之所加。此其勢之所以不傾也。

案當同治之世。俄羅斯貧乏特甚。小民之所勤積。每不敵貴人富賈之所虛糜虧折者。故其時母財耗而外債日增。然則斯密氏所云。亦有不盡然者矣。

蓋縱侈放流之失。根於一時之情欲。方其盛熾。遏抑固難。然其勢每不可以持久。至於勤儉積蓄之事。則起於人心求進之所同。孜孜然如掘井之求泉。閔閔爾若嬰兒之望長。自有知識。至於蓋棺。未嘗或已也。夫謂一身之中。有怡然自足之一時。不復望進。不復顧餘者。其人寡矣。既樂求進矣。則太半之民。常以加富爲進境之最實。而加富之術。又莫若撙節歲入之常可行也。故縱侈揮霍之事。雖爲常人所或有。抑爲一二人所常有者。而察之衆民之中。求之舉生之際。則一國之內。儉蓄之用。常倍蓰於奢侈之行也。即以妄爲而論。經營之事。民智厲而愈優。亦善而有功者多。不善而敗仆者少。今者市中人語。勦曰倒閉歲多。然試合一國而言之。則千賈之中。倒閉者殆不過一人而止。商群日廣。倒閉之禍。乃人生受罰最酷之端。中智之夫。莫不知避。

若夫人情之變。鼎鑊如飴。是固不可以常理論矣。

是故國家之傾敗。資盛也。恆由官吏之放恣。而不由民庶之驕奢。夫一國之租稅。每歲之度支。已爲不生之費矣。宮寢朝廷之美富。百爾執事之雍容。神甫牧師之嚴重。步騎樓船之張皇。當其隆平。既非生財之衆。四郊多壘。又有軍興之煩。就令有取於敵。而以比居平養兵之所糜。豈乎遠矣。故王侯君公大夫將卒者。不能養人而常待養者也。使制治者不念其爲竭民膏脂。耗損國力之衆。使之相乘益蕃。浮虛冗濫。其國歲殖。所費日多。勢且無所子遺。以贍來歲勞民之食。則乙歲之殖。不及於甲。丙年之計。更適乙年。夫上供之費。法宜止於支費之中。苟浮濫之餘。國之度支。盡此而猶不足。則其勢不能不侵母財。母財既侵。息租益乏。民雖極於勤奮。而損下者終不足於益上。此叔季之世。所以流離者衆。而國月削日微也。

雖然。國至於此極者。蓋亦罕矣。大抵國中儉勤之民。爲數常多。而其力至大。其勢不獨有以補倍民之侈靡。且有以救君上之驕奢。修業厚生之意。清淨純一而無間。其

力常流於閭閻吠畝之間始也一國之進化以此民生之樂利以此而美俗既成之後毀之亦難故雖爲上者不幸敗度亂常其民力猶足自完而彌縫其敝此如生人之身既成丁壯之後雖偶有陰陽之沴災庸醫之誤治而元氣未漓終有以自復其常體也

夫欲一國歲殖之益多舍生者益衆爲者益疾無他術矣欲生者之益衆道在食功庀材之母財廣欲爲者之益疾道在利其善事之器而分功密然則二者皆益母財而已利其器者益常住之母財也密分功者益循環之母財也故國有紀乘苟取其二時之富厚而較之顯然見後之歲殖過前時田野加闢工業愈繁商域彌廣則知此二時之中母財所增衆矣彼動民之所濟較之惰民與在土之所耗者必倍蓰不啻無疑焉國殖之進各國同之使無內訌外侵而民生樂業則雖制治未善其進而加富自若也特欲考其實所取二時宜略相遠蓋國財進境恆漸而進使二時太近則不特爲進難知而人情營於目前往往因數業之失利幾處之偏災遂慨然謂生

計之日促而其質乃大不然也

譬如今日英國之饒富凡土地民人之所歲登者持較百餘年以往當察理第二復辟之英國其過之固無疑也而乃居今日不五載以前有人著書極言民庶之流離田疇之荒廢百工衰少商業耗虧者此其見非出於黨私門戶之忌嫉而故爲呼籲以聳當途也彼方深信極喻其爲然故不惜號譟聲嘶以誦同國其本於至誠如此而其所采之說乃大謬於事實如彼吾故曰較二時之國財其取點不宜太近也

若夫世治降而彌隆國財降而彌進大都皆然無或爽者今若以察理復辟之英國持較額理查白之代則又進矣以額理查白之富庶持較約克與蘭克斯特互爭之時則又進矣而以此時較之威廉開國之世以威廉之世較之撒遜七部之世其差數又將顯然夫當撒遜七部之世英之貧饑可謂極矣然以比凱徹至止之時英之士著與北美之原種無以異者又未嘗不大異也草昧降開民生漸裕有灼然無可

疑者。

其有害民生之事。世而有之。蓋不止公家之暴殄。民庶之豪奢。與夫墮武窮兵。致國財不養能生之功。徒資不復之費而已也。甚至內訌方深。國民廢業。虔劉錫奪。蕩無子遺者。亦世有之。卽如自察理第二復辟至今。吾英號爲幸國矣。然其間勢亂敗危之事。夫亦何可勝書。使其前知。必將謂繼斯以迄。不可爲國。若倫敦之大火。半城盡爲灰燼。一康熙二十七年。一不旋踵而大疫。民亡其什二三。其後英荷之兩戰。雅各之民訛。愛爾蘭之內亂。法蘭西之四戰。民變之再興。此皆復辟後事也。英法之難不解。國以負債者百四十五兆。合之前後籌防善敗之費。蓋靡者不下二京。凡此皆國本之所以致虛。民生之所以無賴者也。假令天福吾民。幸無此障。則將移此爲厚生之事。不知歲進之數。增者幾何。是中宮室之加多。畎畝之加闢。工之所造。商之所通。百年以迄。雖有精計之夫。不能算矣。

○案自拿破崙破命放流絕島之後。英之無大兵革者。殆百年矣。而美利堅自華盛頓建

國以還四封晏謐故至今英美之富厚遂甲五洲斯密之論所謂懸諸日月不刊者矣顧其間如亞洲之波斯土耳其諸國歐洲之義大里西班牙平靖者亦數百年其國不能稱富則何耶豈皆天時地利之不若耶羅哲斯曰國家害富之事邦國外侵不若庶民之內訌庶民內訌不若稅政之時行蓋邦國外侵之費待之以帑藏民賦猶不足則借貸以償之皆歲殖也故其害在子而不在母至於內訌則不特勞民罷業而戕賊殘毀所謂常住母財者往往罄數百年之所締造然猶不及稅政之害也稅政行民之身家不保將群之所待以立者舉以蕩然尙何論於財富乎

國家用財不節致吾民進富厚生之事緩而難期則有之矣而欲絕民財進長之機又不能也今吾英土宜民巧之所出固遠過於百年以往者由是而知其所用母財必亦遠過百年中彼操柄之人賤削吾民可謂不遺餘力幸厚生之性民有秉彝上之所廢終不敵吾民之所積又幸英律差平下民之執業治生可惟所欲爲非其上

所得過問。此則英國所以阜財致富之命脈。但使此制長存。民之生計。可無慮也。獨是英自開國以來。從未蒙君上恭儉爲民之福。上行下效。故亦無崇尚儉德之民。昔政府嘗鯁鯁然慮其民之不節致嗟。爲之頒立法令。曲防事制。非徒無益。傾倒甚矣。彼謂民飲食衣服。須有等差。毋許僭濫。又禁外國奇物。勿入邊境。諸如所爲。多可笑者。不知國有侈民。卽存公等。誠欲崇儉。理從上先。使上而儉。吾未見小民之以奢自累也。

案羅哲斯曰。斯密所指。蓋先英之日用律。今則廢不用矣。當斯密時。尙爲民害。故其言如此。考古今所至不同者。今謂國家民之公隸。古謂君上民之父母。旣曰父母。則民拂勞來之政。樊然興矣。卒之元后聰明。不必首出於庶物。其爲顯微計者。名曰輔之。適以錮之。名曰撫之。適以苦之。生於其政。害於其事。此五洲國史。可徧徵以知其然者也。是故後之政家。僉謂民之生計。祇宜聽民自謀。上惟無擾。爲裨已多。而一切上之所應享。下之所宜貢者。則定之以公約。如此則上下相安。而以

富史遷申老之言曰。善者因之。其次利導之。其次教誨之。其次整齊之。最下與之爭。又曰。此豈有政教發微則會哉。各勸其業。樂其事。若水之趨下。日夜無休時。不召而自來。不求而民出之。豈非道之所符而自然之驗耶。其丁甯反復之意。可謂至明切矣。

儉則國之母財增。奢則國之母財減。所出正如其所入者。其母財不減亦不增。而有同爲奢矣。以其用之不同。而於國有異效。蓋物有耗之今日。而明日所耗如今日者。有其物可久。今日既耗。則明日不必耗者。譬之多財之家。日食萬億。賓客豪飲。群奴大嚼。多畜狗馬。外作禽荒。此一術也。其有斧藻楹桷。闢治林墅。几榻精緻。廣羅圖書。此又一術也。其有加意致飾。明珠瓊瑤。金剛琥珀。灼爍滿前。此雖更鄙。亦一術也。其有綺繡金羽。衣裳滿箱。宛死之日。誰復檢曳。此雖最劣。亦一術也。今設甲乙二富郎。甲之侈靡。出後三術。乙之恣肆。用前一術。將甲之所爲。日見其積。今日所有。較昨爲多。而乙則不然。事終所有。較之方始。無所多也。故日月之後。甲將比乙爲富。凡甲之

物固不必悉如其原值而乙之所費乃無一餘者。

家既如此國亦有然若宮室若器皿富者之所有也年月之後將爲中戶之所資富者既久而厭之他人購取不必原價也故一國之室居器物將以漸美國久不被水火刀兵者往往中下之民享富貴者之奉其物尙完善也而其主已易使非人情之厭故而喜新則中下之民勢必不能自作而自享之也賽摩爾之舊第今爲旅館雅各第一之昏牀其后擅之丹麥者今在丹和林酒肆中每經數百年古邑見其中無一宅焉爲居者所自建廣宮華墅數十萬卷藏書石像圖畫及他骨董充物紛羅皆前人之所遺棄者此其物不僅飾觀而已實一地一國之所永寶而爲聲明文物之徵者也如法之華賽爾英之威勒登斯突是已義大里之財力不足道矣然猶以舊國多寶藏之故尙爲文物之邦間當日爲此之人致此之力則無有存者矣然則費其財於可久之物者有形而易積糜其力於一昔之奉者旋滅而無餘明矣且費於可久者易於改行糜於旋滅者難於更張也今使有人於此前者僅指百千

矣。忽裁其數於甚少。前者廣筵盛設矣。而忽變爲數盞之陳。前者車駟雍容衣服都麗矣。而忽徒步杖藜冠履純素。若此有不爲旁人之所訝。而謂其事有失意者耶。故修習旣成。不可卒變。變必有所迫而後爲之。而費財於可久之物者則不然。事土木羅金石。收圖書。一旦覺其所爲之過。爲力所不任。幡然而改。固無難也。旁觀者亦不從而議其後也。卽有議者。將不曰其財之不供。而曰其意之已闕也。

又有進者。費財於可久之物。則其所養者常多。費財於卽消之事。雖曰膳百人。惠亦福也。夫一夕之宴。膳割百筵。旨酒千罍。所饋可謂廣矣。然其究也。饗者半。毀者半。饗而賢者。半之中又有半焉。向使如是之費用之。屈梓匠。攻瓦石。將消靡之施。皆有受者。且其所養者多。生利之功。則於國有益富之效。雖侈而未嘗侈也。

是篇所論。不過推事勢功用之所極。而於心固無所偏主也。如曰養生利之功者。爲仁人。爲義舉。耗於不生利者。爲不仁。爲非義。則大不然。吾所言者事效。而用意之美惡。非吾書所有事也。卽如前事。費財於一昔之奉者。其人可爲仁人長者。而爲積於

可久之物者。用財必求其反。或爲封疆刻鵠之小人也。第自一國而論之前之爲事。其用意雖美。於國財爲耗。而主於致貧後之爲事。其人雖不仁。於國財爲利。而主於加富。讀者幸勿輕用其警警也。

案此篇分功之生利不生利。正與本部第一篇之分歲殖爲支費。母財相表裏。斯密意主進富。故其用意措詞。於第一篇則重爲母之財多。於此篇則求生利之功衆。然此皆致富之由。而非享富之實也。今使一國之民。舉孜孜於求富。既富矣。又不願爲享用之盛。則亦敝民而已。況無享用。則物產豐盈之後。民將緼然止足。而所以勵其求益之情者。不其廢乎。是故理富之術。在一國之母財支費。相酌劑爲盈虛。支費非不可多也。實且以多爲貴。而後其國之文物聲明。可以日盛。民生樂而教化行也。夫求財所以足用。生民之品量。與夫相生相養之事。有必財而後能盡其美善者。故曰倉廩實而知禮節。衣食足而知榮辱。禮生於有而廢於無。由此觀之。國之務富者。所以輔民善治也。家之務富者。所以厚生進種也。皆必財之既

用而後得之。藉曰不用。則務富之本旨荒矣。此乃費之所以多爲貴也。顧事必求其可長。而養必期其無竭。且國之戶口。既以日滋。則財之爲物。亦必日進。以與之相副。此憂深慮遠。務蓋藏積聚之民。所以又爲一群之母也。約而論之。財如粟然。其專尙支費而不知母財之用者。糴而盡食者也。其獨重母財而甚尙支費者。罄所收以爲子種者也。二者皆謬。獨酌劑於母財支費二者之間。使財不失其用。而其用且降而愈舒者。則庶乎其近之矣。

篇四

論貸貸息債

以所積貸人而課其息。此貸者之母財也。貸貸必有期。期熟其財復於貸者。而視期長短課子錢焉。此舉債之常法也。或者用此以爲母財可也。用此以爲支費可也。以爲母財。則所養者生利之功。故其費可復。且有後利。其債債也。資之原財。不他仰也。以爲支費。則所養者多不生利之功。而奪生利者之食。故其費不可復。而債債也。必

仰於他財其原財則銷而無餘矣。

夫稱貸之事爲母財爲支費固皆有之然而爲母者其常不爲母者其偶也仰支費於貸財其勢不可久而貸者常至於悔於兩家莫利也故其事難常。

以產爲質則雖貸財不爲母而人猶樂貸之然以產質財者不必盡以爲支費也使其費之則費先於貸鄉邑舊家其家室口體之需半由除費索債者所則質貸以了之故其所資者所以復市肆工賈之母財而益之以利也求於其租入而不足而後爲此耳。

所資貸與者泉幣也或金銀焉或鈔券焉而指其實則貸者之所取貸者之所予皆非泉幣也其泉幣所當之物耳彼貸之以爲支費乎則所易以卽享卽用之貨物也彼資之以爲母財乎則生利之功所資之物料器用與饋廩也是故以財貸人者畀之以御物之權取已所得役之物力以與人也。

所以云資貸者泉幣而非泉幣必爲所當之貨物者非故爲此無用之別異也蓋因

財力不如是將不明。蓋一國之內，相資貸以錢鈔，而錢鈔者不過相轉之器耳。而其中可轉之物力，不得以錢鈔之數限也。錢鈔一而物或百十焉，何以明之？甲乙丙三人爲貸者，辛壬癸三人爲貸者，始也甲以千金貸辛，辛用之以購千金之貨於乙，乙無所用是財也，以之貸壬，壬用之以購千金之貨於丙，丙又以貸癸，癸又以購貨如所值焉。夫如是之爲，同此千金之錢若鈔，數日之頃，以爲貸者三，以購貨者三，每皆千金之數。甲乙丙之所界者，御千金之物權也。辛壬癸之所受者，千金之物值也。所以轉此權者一也，而所轉之物三之。甲乙丙之財常復以息，辛壬癸之經營各有贏利，且此不限於三而止也。雖三十三百可也，而所爲千金者，則猶故物也。是以知一國之物力，其可斥以貸人者，視歲殖之所出，與主者所不欲自事者，而所以通之財，爲無與矣。以其無與，故不得準之以論母財之盈虛也。且其所出息錢，亦與農工諸之贏利異。息者，所以得權之資也。贏利者，自用母財勞而後獲者也。

故以母財貸人者，與盡其歲殖之一分以借人者，無以異。其爲此也，必有期。當期，資

者歲有所納。是謂之息。及其期盡。貸者之復。如所貸者。是謂還母。若還母。若納息之。二事也。世皆以金銀幣幣爲之。故習而不察。不知二物之殊。苟審其實。則母息二者之所當固大異也。

國之歲殖。必有大分以復母財。惟母財之待復者愈多。其國中之息率乃愈大。富民之歲費。支出於所有之母財。又不願自役其財。以自求其贏利。國饒如是之財者。而後齋資易而息率輕。

國富積多。願貸者衆。則息錢世輕。此如物矣。供者日多。求者無幾。則其價漸廉。然尙有他故。母財日廣。則贏率日微。有母財者。求善業而用之難。難故其勢競。競則相排。排之道。在舊賤而買貴。所售者取物之權也。所買者生利之功也。夫如是。則息日廉而庸日增。息廉者始於贏薄。庸增者始於母多。此富國勞民之所以日休也。

往者洛克羅約翰滿特斯鳩及他數公。皆謂自西印度礦產日闕。世之金銀噪多。多故賤。賤故其息率降微。此其說初若甚當。然乃大謬。休蒙大關駁之。宜矣。若無待不

倭贊言者。然有簡而易明之說。使數公明此。不至墜雲霧矣。

案息亦以金銀爲之。此限前聖不審洛克諸人之何以誤。宜其蒙後人排擯也。

美礦未開之前。貸百歲十。歐洲息率大致如此。既開之後。則歲息降爲六分五分四分。至於三分者有之。今設銀值之降。與此比例。譬如歲息由十降五。其國以銀購貨。前得一者。今亦半之。此不必事勢之誠然。特以借喻。以見銀值之高下。與息率微鉅。絕不相關已耳。其國銀值。既以減半。則今之百。不過前之五十。今之十鎊。不過抵前五鎊。如此。則無論銀值因何而賤。其母之賤如是。而其子之賤亦如是也。大小固異。比例則同。故使息率同前。無論銀值之如何不同。則其母子相待之數。終無有異。而息率稍變。則母子相待者。因之亦變。今之百鎊。僅抵前之五十。則今之五鎊。僅抵古之二鎊十先令。明矣。故息率之變。由十至五。而銀值之減。亦半於前。則今以百鎊得五鎊之息者。猶古以五十鎊行二鎊十先令之息也。如此。則與百之得五。所謂名實未虧者也。

大抵國中之三品驟進而物產如初則三品必緣以減值然其效不見於三品之賤而見於百物之貴名貴實則同也其物之易錢雖多而其取功養人之量必同乎昔故其國之易中雖若加多而其國之母財未或增減且其所當同而名數衆則交易之事轉以贅重未見其益反不便矣國中所以養生利之功之母財如故物價工庸雖貴而出以易物之所得亦與舊均二者以金銀之多寡言故實同而名或進至於贏利以比例言則名實舉不異前矣贏利者子錢之所從出也贏率無變故息率亦無變

反是則物產加多而泉幣如故者可以見矣不惟三品之值進也將亦有他效焉母財之數名同而實多其名價無殊而取功致物之權則進母財既多工市自廣故其庸雖或見少而實增而贏率則日退贏率既退則息率必與俱微矣統前後觀之息率進退之情如此夫豈如前數公之所論礦產大出而息率遂微也哉

有國焉以貸財取息爲不義則制爲律令以禁之然而得人財而用者其勢將有所

生則其分利於主人亦物理人情之至正。是以其法雖立而常不行。且事反所期而息率爲之加大。蓋方其未立禁例也。通財取息之家爲所當爲。無悞刑之慮。及其禁之則犯憲而其身有刑。夫犯憲有刑。人情所至不願也。則欲資其財者其利必加。優而後其財可得。以資也。此以計學之理言之。則常息之外。加以保險者也。息未嘗加。所加者乃保險費耳。

有國焉。不禁貸財取息。而禁過重之息。名過重之息爲剝利。犯剝利者有刑。此禁爲急於前。然其所限之息率分數。宜大於市中通行最輕者。乃可行也。夫同爲稱貸而息則此重彼輕者。其相任之情異耳。故債最信者息最輕。使律爲之限制。欲一切取最輕者。抑猶不及。則其敝與全禁取息無以異也。貸者之所取。必準時酌勢。不肯劣於所應得者。而貸者於此之外。又必保險焉。法愈重。則其所謂保險之費愈多。又使一切用最輕之息率。則僅愿之民。將被其殃。愿者畏法。而力又不能出穩實。則其勢且折入於剝利者之家。英國貸財常息。以債歲百三。私家相資貸。有穩實者。率歲四

分若四分五釐使律定五分爲通行息庶乎近之

國家之制通行息率也宜略過於市中之最輕者而不宜遠過假如今日吾英息率議院定之爲歲八分或歲百十則國中持財將歸於輕銳喜功之人蓋惟此曹而後舉重息而不恤也謹審持重之人計獲國全而後舉債必不與輕銳者競也然而成事謹審持重者居什七八而債事輕銳喜功者亦什七八以制重息之故輕銳者之舉債易持重者之舉債難則國財之不復者亦什七八矣使制息略過最輕之率則有財之家將擇謹審持重者而貸之輕銳者之事疑故爲之者少持重者之事信故爲之者多則息輕重雖殊究之所得亦正等耳而國財少失多復則民生之大利也案後人謂斯密氏此節爲贅言蓋國家之所制息者防剝利也故爲之制輕則有前者之事驗至於制爲重率無所效矣夫有財者以之貸人不以制息甚重之故也所留意者債之必復合耳凡民之貸以息重輕皆有其所以然之故大抵成於時勢而非民所能爲爲國者所宜一任自然乃無流弊即欲補救亦當計本清

源而後有益徒制末流鮮不病也中國雖禁盤剝然其律若虛懸不用英與法德美諸邦輒近乃廢夫亦知其無益爾

國中行息有率爲上者欲以法使之更輕必不能也往者法國當一千七百六十六年息率最小者五分而著令不得過四一時莫有行者有貸貸皆五分以上而爲之多立名目以與法相通又何益乎國中地價高下與稱貸之息率重輕相表裏所以然者人有餘財而求歲有所入則踟躕審擇於二者之間買田宅乎抑舉以貸人取利息乎田宅安而可恃且有地者人情所重故租入雖稍微猶樂爲之而地價漸以高然使所差過鉅財息甚優而地租甚微則人爭出貸而地價漸降大抵財息什一之時地價常法十年十二年而復使財息日薄降至百四五者地價亦進貴三十年二十五年乃復也英與法相比法之財息重於英而英之地價大於法英人售地之價大率三十年復法則二十年復其得售也

案世界降而愈通則生業息利之事其不齊者日寡民所擇者在各適其才地而

已外是無所擇也。然而業終以有地爲貴者。其故有二。一曰地日降貴。此或由智巧之進。所收日多。抑生齒之繁。曠者日寡。二曰有地之榮。同居一國之中。有地籍者。其聲氣權力。常大於無地籍者。然以地業變轉之遲而難。故逐利者或不喜。而先之前之二便。以敵後之一不便有餘。則地利常優於他業。爲子孫計。莫此長矣。

篇五

論役財治生之不同

凡財號母。皆以養生利之功。雖然。以其業之不同。故同此財。而其所鼓舞興發之人。功大有異。而所生後利。所以增進地產之價值者。亦以不同。大抵母財爲用。分爲四途。一曰登成生貨。取之自然。（此農之事）二曰製造攻修。轉生爲熟。（此工之事）三曰轉運百產。挹盈注虛。（此商之事）四曰披整售零。周給民用。（此賈之事）一之用財治業。如耕田。如采井。如收漁。是已。二之用財。則凡開廠設肆。以百工者是已。三之用財。凡以舟車漕輓。大宗貨物者也。四之用財。坐列行市。沽售細瑣者。

也。今總而名之曰農工商賈四業。則天下母財之用。大率不外是已。

案此外尙有其資習業之事。應爲第五。後之計學家謂民巧爲國富之一。其始亦斥其積勞。而後能得其事。於斯密氏所列四端。又難定何屬。因應更列一門。國富攸關。殆不可略也。

農工商賈。雖分四業。而不可偏廢。亡其一則三者不能獨存。亂其一則三者不能獨治。對待相生。而後群理遂焉。此可累指而明。吾說者也。

使民不斥財以修農業。則地產不登。民食物材。舉以無有。則工商賈三業廢矣。又使民不斥財以修工業。則地產之待人力修治而後可用者。舉以不供。始於不供。終於不求。其生將絕。卽有不待人力而能生者。然其物以易則無價。而於一群財力生事。靡所加也。又使民不斥財以治商業。則生熟二貨。棄地不遷。生成之家。自享有限。而所謂懋遷有無之事。舉廢而民不勸功矣。終之又使民不斥財以修賈業。則生熟二貨。合而不分。聚而不散。民之生事。非其無有。卽其過多。無有則害生。過多則廢財。富

者已窘。貧者益病。商無所爲通。工無所爲作。卽農之所出。其利亦微矣。故曰不可偏廢而對待相生也。

嘗觀俗論之於民業也。於農工商常恕。於賈常苛。雖然。無謂甚矣。試舉其一。屠肆者。肉之賈也。設一地無屠肆。將食肉者非得全畜不可。其不便爲何如。勞力小民。劬須購備半年三月之糧食。則其人之所區以爲母財望贏利者。愈益寡矣。是故商民之所便。莫若日出財以取其時需者。日索其所需。則有資皆爲母財。其滯而無所生者寡矣。雖零購之物價高。而相抵之餘。猶有利也。古之言治者。以賈人逐利之近而易見也。則相與鄙惡其行。以爲汙處。厚征以困之。著之市籍以辱之。若惟慮民業賈之多也者。雖然。賈多於國何病乎。賈多自病。則有之矣。百家之邑。所資日用之物。固有有限也。物有限。則其斥母也不可以過。使業之者多。則其勢當出於競。競則購者之便而賈者之不便也。故曰賈雖多於群無所損也。且一業之多也。當有其所由多之故。方其趨少。法不能爲之多。及其降多。法亦不能爲之少。有見醉人之衆者。曰是由酒。

肆之多致之。不知以嗜酒者之多而後開肆者夥耳。

案謂買多自病。意謂多則競。競則價廉也。顧其事不盡然。同業人多。價轉以重者有之。故計學家謂競市可共市而競不可。此說見前部矣。

農工商賈皆生財之民。被力於物而物值長。故其用母也。勞常可復。而且有贏利之進焉。農之贏利出於所生。工之贏利待於所成。商賈之贏利取於所鬻。雖然是四業者其用母同。其所鼓之民功多寡殊。而物產經夫四者之家。其所增之值亦異也。故買者之母財。所以復商者之所費。而益之以贏利也。商得此而其業可以久。顧其所鼓之功。舍行衙坐列之衆。無他民焉。而其所益於物值者。亦即買者之贏也。故四業之中。買之母財所食之功最少。而物值之所進最微。

泊夫商者之母財。則以復農與工者之所費。而益之以贏利。農工得此而其業以久。故有商而後生者之衆得所養。而百產之值以優。其所鼓之功。不僅懋導之衆也。既通有無。斯消輓舟車用矣。故其所益於物值者。商贏而外。猶有轉運之庸焉。然則其

進於賈業之所爲遠矣。

工之母財有常住循環之異用。用於常住者以善器也。則以復他工之所費而益以贏矣。用於循環者以飭材也。則以復農者之所費而益以贏矣。顧循環之中常必有其大分焉。以爲食功之餽廩。是故工成物而物值之進也。常總此數者之費而嗜之其所增物值之多。其所鼓人功之衆。方之於商又倍蓰矣。

若夫用其母財而所鼓之民功衆。所增之物值多。則莫若農業爾。其所鼓之功不僅民之手足也。乃至禽獸之筋力。不僅人畜之爲用也。乃至天地風日雨露膏澤之自然。夫自然之功收之者不必費也。及其成物利與勞民手足之所致者無以異也。田事之大者非生也。致也非益也。導也。一隴之田縱其自生。蓬蒿荆棘靡不有。今不此之生而必嘉穀嘉實之殖者。則眞農之事也。加犁犂塹之後。土之穰沃未加乎前。而繼者之所生必在此而不在彼。且種既播矣。穎既分矣。則終之者皆自然之天功也。民何力之有焉。取天功以副已力。故農之所復常大過其所前費者。不若工商賈之

僅復母財而益之以贏利也。所謂過其前費者。則於租見之矣。故租者所以酬地力也。力有厚薄之差。而租有高下之異。上者參其所收。下者亦四而一。凡此皆復農所前費。加贏率而尙有餘者也。其餘利之大如此。雖在工業所未嘗有也。蓋工之利皆準人力爲多寡。而無自然之功。而農則天事處其大半。故母財之施於農業也。不特所鼓之民功多也。而所增之物值亦至廣。故農之利非工商賈所得同。而以之進富乃最速。

案所謂工之利皆準人力爲比例。無自然之進。若農者。斯密此語常爲後世之所駁。水碓風帆。至於一斗之煤。一筭之汽。苟非自然。誰之力耶。且人非得自然之助。勢且無從以有功。何則。人力必仰於食。是亦所謂自然之力也。其言固是。然斯密之意。特指其粗而易見者言之耳。非若後之格物家。推一切功力之原。而悉本之於日輪也。

母財有內外之異。農賈母財。大抵皆內。而其用之也。亦常聚而不散。一家具母。以贍

一莊一肆之中不外蔣也。至於蔣之母財則不然。遂利而移。常無定所。其所注意者買賤鬻貴而已。

工業用母必在製作之地。固矣。然而製作之所則無定也。不必在其物材之所自出。亦不必在成貨銷售之區。法之理安。非蠶桑之地也。其成貨行銷尤多遠所。昔昔利蠶桑矣。而民所服絹帛。乃非其地所自織者。西班牙羊毛大分入英。成服而後復於其國。

國有餘產而商爲之通。其爲地者爲旅人。於吾國無以異也。假爲旅人。於國所損者。不過少一勤民。與其所歲進之贏利耳。至其所雇用之操舟將車與夫轉移執事之手指。爲內爲外。亦無以異。蓋商之職。在出其母財。以易地產。繼乃以是與他所之有餘者爲易。運致本地。以供吾民。其有以復產貨之所費而益以贏利同。其有以使農功之久於其業又同也。地著旅人。何必辨乎。

若夫工之母財。則以不出境爲國之利。其所鼓之人。功其所增之物。皆有關於國。

殖雖然出境矣而利於其國者亦有之波羅特近海地多出麻枲英國之工致而治之以轉售焉其所用非產國之財也然不可謂於其國爲無利使吾國之工不求則莫爲通其利將廢自英工受之而有以復商之利而後商爲之通而有以復產者之利也

案此所謂不得已而思其次者耳誠使繞波羅特諸國民既生麻枲矣而又自治之使成布以通天下其利國不亦厚乎中國生貨甚多而工場皆在外國民業不進殆亦由此各國相忌立條約不許外人設製造所於是邦一切機器之用工作之巧愈無由見而習之矣

人有連阡接陌之地而坐無財不能治墾者矣惟國亦然母財常少封內之地不能盡闢水利不修土壤瘠確或地有所生矣工業槩劣不足成貨有時地力人功所出不少自享之餘末由運致遠方以所多易所鮮誠如是則其國農工商三業病矣不列顛境內地以少財燕者尙衆蘇格蘭南境之羊毛無力自織則閉關走數千里棘

道荒塗致約克沙而織之。英倫製造小部皆以不能遠銷致成貨劣少。旋踵塞滯民之貧困由於母財之隘者多矣。

案當斯密時英國內景如是。此其與今日之英真霄壤異矣。所云農工商三業之困求之中國幾於無地無之地之不開不必西北。雖吳楚財富之區往往而是。二十餘口所出大抵生貨則工業幾於無有。不但衰也。彼有來舟我無去筏。卽至絲茶大利亦聽他國之奪其市。未嘗一考其由然。官不爲民謀民不爲已謀。國日以庶而養民理財之計若一任天運之自然者其貧且弱非不幸也。竊謂補救之施在農工難而在商易。國家於東西各國既遣使臣各居其國矣。及其閒暇訪求其國所可銷售之華貨數年之後自置輪舟運銷各國母財誠少不妨先爲其微者俟其利可恃而後徐擴充之。祛他族之壟斷開無窮之利源不能不有望於後之人也。

使其國見有之母財取以周農工商三業而不足則莫若用之於農蓋用之於農其

所鼓國內之民功最衆而所增歲產之價值最多也。次農莫若工。至於商則所鼓之人功所增之物值儉矣。

案此說理嘉圖不以爲然。說見其書之第二十六篇。

夫國之母財欲以徧周三業而不給則未爲富國。抑富矣而未充其量無疑。然使取不足之母財而盡治三者其於求富之道未必當也。蓋國猶家然其母財常有限也。故可以周其一而不可以及其餘。欲家之財進者在節其所進而積之。國之母財則積衆積而爲之者也。故欲其國母財之進者必使其民之各有餘。有餘視歲殖而歲殖視通國所鼓之人功所增之物值。

北美英屬自開通以還。駸駸富盛者。實由專注農業而然。其工業至不足道。若夫山家械器。淺制粗材。成於婦孺之手者。固無訖矣。通國所外輸與夫沿海之運漕。皆英商爲之。甚至行店屯棧。如威占尼亞馬理內各部。其主人亦居英國。夫農賈而用外。此故希有者。而吾於北美見之。今假北美富民約禁他國熟貨不令入口。而令國

中取前治農業母財移營工業以贍其民則此舉於富盛之機爲助爲沮正未易言又設區其母財以配斷商業商工之厚農之薄也則富盛可見爾

國之繁富無極其母財周農工商三業而有餘者史傳中殆不概見嘗聞東亞支那埃及民視海爲畏途印度不喜浮海殆與之埒而支那之民又從古未嘗以通商外國爲也故其國物產凡內銷所有餘皆外國互市者爲之轉輸取其所有而復之以其所無所復者又惟金銀二貨爲多

故同一母財之用其於國也所鼓之人功有多寡所增之物值有微鉅無他其用於農工商三業者不同焉耳且卽用於商業矣而商業殊致則富國之效亦從而異此又不可不論也蓋商業爲異者三國中貿易一也境外貿易二也國中與境外貿易三也國中貿易者受貨之地與售貨之地均在商者之本國也境外貿易者受貨售貨之地皆在外國也國中與境外貿易者受貨售貨一在本國一在外國也其不同

如此。

斥母財以事國中貿易者。其所易或耕牧漁礦之農貨。或制作之工貨。凡有一易必復二家之母。而所復者皆居國中。以爲更始。其功之用。蓋供貨者之所收。雖至穀必如其母。前也斥母食功以出貨矣。後也售貨受價。更以食功。而其業以久。此常道也。譬如一諸具本。收農工之貨於額丁白拉。致之倫敦。易彼所之貨。以反於額。如是而額與倫二家之母皆復。而不出英倫之境。

國中與境外爲易。所復者亦二家之母財。而其一在境外。其一在國中。其復母所賄之民功亦然。此如致英貨於波陀。爾易波貨以返英。其所復之本。英一而已。其他則波有也。故中外懋遷之事。就令母財之復。與國中貿易之遲速正同。其業之有益於本國之民功者。僅能半之。

案此說理嘉國亦持異同。不盡合也。

況乎其復也。常不若國中爲易之速耶。國中貿易之償價也。大抵不過歲而歲中三

四度償者有之。至於中外互易。速者必期歲盡。甚者度二三歲。然則同一母財。爲國中之易者。已十二次。而爲中外互易者。止於一次。并前事而言。則母財數同。爲國中之易者。其獎進本國勞民之效。二十四倍於爲中外互易者矣。

國中與境外貿易。有徑有紆。紆者奈何。其取境外之貨也。不以國中之所產。而以他國所產與之轉易也。雖然。其事必其本國之所有。夫戰勝攻取之所得者。無論已。舍此則外國之貨。未有不本之國中之民力物產。而可以徒得者也。故自本國觀之。中外貿易之事。其效紆與徑同。所異者紆之終利愈益遠耳。蓋其轉折繁矣。今使運英之熟貨。以易威占尼亞之菸葉。復運威占尼亞之菸葉。以易力嘉之麻葉。是商欲更用其母以舉他事者。其必俟前二易之各復其利。明矣。又謂易威之菸葉者。非英熟貨。而爲雅墨嘉之糖與蔗酒。則前二易者。今乃三易。商之收利。不愈遙乎。又使其事不出於一商。二商三商。分而業之。以轉相授受。如是彼各商之收利。徑於四矣。而終利之歸。除如故也。故貿易從其紆道。其中所川之母財。出於一商可也。出於數商可

也其收利自商視之則異自國視之則同如前之一事其動母必三倍於徑者究其中皆以英之熟貨易俄之麻桌耳自所鼓之國中入功而言之徑與紆之貿易用本同而利國紆不若徑也

中外貿易紆徑二塗不同之效如此苟其從紆則不論轉相易者之爲何貨卽如巴西之金秘魯之銀原其得之亦猶威之菸葉必以國中之地產或國中地產之所轉易者易之外是則彼二土之金銀末由至故自效見本國者言之苟二礦不出於國中出金銀以易人貨者皆紆道之一端其所鼓之功所復之母皆不如徑以爲易者之大且速也雖然用金銀而便利者亦有之蓋其物易挾而本值多其不受震盪磨礱之傷甲於百貨占位少而運費微不蝕不吝而保險易故以之爲易最便而於國之所費最廉或曰常出金銀以與他國易貨者其弊爲漏卮國將漸貧此則部丁所詳論而明辨者也

惟境外貿易所斥之母財於本國人功爲無所鼓其每番爲易必復二本與前者同

顧所復者皆在境外。本國所得獨本商之贏利耳。譬如德意志一日耳曼未合之先。英人稱荷蘭民爲德種。與今之德人異。一商斥其積蓄爲母。以運穀於波蘭。致之波陀噶爾。其回船則運波陀噶爾之果酒。以致於波蘭。此其所復之二母。於荷蘭皆無與。荷蘭得者。獨其贏利。其國歲殖。所增僅此。然使所用之海船水手皆德產。則母財中所用以造舟雇傭者。亦荷之所收也。大抵爲境外交易者。皆操此術。用本國之船人。轉他國之貨物。故俗呼操此業者爲捐商。以其具人船爲他國物。若轉移執事者也。顧亦有不盡然者。卽如前事。母出德人。而用英之海船水手。蔑不可也。英本島國。其四封之固。守險之資。視船舶與走海之民之多寡。爲疏密。故捐商之業。於英尤宜。然欲船舶水手之多。不必待境外之捐業也。爲本國沿海轉運者。亦能得之。蓋母本既同。則人舟多寡。不以境外國中爲異。異者視運貨之精粗。與步口之遠近。而其視運貨精粗者尤多。此如紐喀所與倫敦煤運所用人舟至多。二地相距非遠。而其人舟之數。則過諸捐業者。可以見矣。故以法勸民。使斥母以強事捐業者。其所益之船

船水手不必多也。

由斯而談。是三塗之商業。自其鼓本國人功之多寡。增本國物值之微鉅言之。將境
外之貿易。不如中外之貿易。中外之貿易。不若國中之自爲貿易。明矣。其所用之母
財同。而效之及國者異。夫國期於強。強必由富。富者必由一國歲殖之加多。歲殖者。
賦稅之所從出也。計學之所講求。凡爲富強而已。今三塗之損益。既講而明之如此。
則有國者不可設爲政法。使境外貿易。加乎中外貿易之上。尤不可使二者之貿易。
加乎國中貿易之上也。利之所在。民將自趨。立法以禁其爲此。開其爲彼者。什八九
不必利也。

夫苟一任其自趨。而不加之以束縛與馳驟。則三塗之商。當乎其宜。皆爲大利。且有
時民之舍此塗而適彼者。誠亦有其不容已者焉。蓋土有所最宜。民有所偏習。國中
之供而不售。求而不得者。往往有之。夫供之而過。至於不售。非有易者。其生將廢。廢
則歲殖微矣。今如英之物產。若穀麥。若藍樹。若鐵功。三者皆過求之供也。故必出之

境外以爲易而後所欲得者至也。又必有爲之通者而後兩得其平而產者不致虧折也。是故所居近海。溯於可漕之河者。皆利治生。無他。亦便於轉有餘易不足耳。且中外易矣。而有時民之舍徑而爲紆。亦出於不容已也。國有過求之供。則出之以易外貨。而外貨至者。又過本國之所求也。則不得不更出而易之。以致其所欲得者。此中外貿易之所以有紆道也。今如用英產所易威占尼亞馬理蘭二地之菸葉。歲蓋九萬六千鎊。而英之所能銷者。僅一萬四千鎊。首焉。使所浮之八萬二千鎊。首者。不可轉而他易。則一益之餘。其業立仆。而前之英產。所以與此八萬二千爲易者。亦必相隨而俱去。其於歲殖民功。非大損耶。故有時此紆者之所爲。其不容已與徑者之所爲等。有之而民功興。無之而民功廢。

誠使國中之積蓄甚饒。而斥爲治生母財者。又不足以盡之。夫如是。其益爲境外貿易之母財。以豐佐他國之民功物產者。固其所矣。是故國有捐商者。民財充斥之徵驗也。而非民財充斥之所由然。彼采國成者。常欲以術欺民。使操是業。則所謂以果

爲因者矣。今之荷蘭以幅員戶口比例爲言其民力豐饒過諸國遠是以爲捐商者多德人。次荷蘭而言富則英倫也。故其民亦多治捐業者。雖然彼之所爲實而言之則中外貿易而紆者耳。非直捐業也。運東西印度與夫美利堅之物產而致之歐洲之市矣。然其始易也常以英產爲權輿其終事也常以英市所銷爲歸宿。故曰非捐業也。若夫用英之人船以往來以地中海之諸步與夫天竺東西沿海諸捐商則吾英之真爲捐業者矣。

案母財充斥用之國中不盡此所謂過富者也。過富則將爲境外商業斯密所指誠有然者。今日中國沿海沿江諸步輪船公司皆西人而治捐業者也。雖然謂過富而治捐業可謂治捐業即其過富者不可也。十餘年前歐洲捐商多瑞典人瑞典非富國也大抵生業之道民各擇其所最宜者爲之不可以一概量也。斯密所云亦指大凡而已。

三論商業之廣狹何所限乎。國中之貿易其母財所用之微鉅視國中諸部物產有

餘可通之多寡。中外之貿易。視通國物產有餘。可以出國之多寡。境外之貿易。視列國物產有餘。可通之多寡。此其大較也。故境外貿易。方之前二塗爲無限。而其中可用母財之數亦無限。

人有蓋藏。可斥爲母。將爲農乎。爲工乎。抑爲商賈乎。大抵各計身家私利而從之耳。至於所居之國。緣彼擇業之殊。其所鼓之人。功有多寡。所增長之物。殖有微鉅。則未嘗煩其神慮者也。使其國農利誠最優。執耒耨之功。一朝可以觀大宮。則國人之用本。與通國之公利。將不期合而自合。民各營私。而國亦不期而進富。而無如吾歐。今世歐歐之利。不較他業爲優。雖近者持論之家。奮舌揚衡。極言滄壑之得利。此富而擇業者所鑒聞也。然相觀事跡。已足證其說之謬矣。每見壯年涉世。操至微之積蓄。甚或赤手無薪。以肩揹肘拒於賤賣貴工。賈商業之間。朝爲無賴。暮號素封。云蓋比比也。而百年以來。所謂勤本業以致富者。寂寂無聞焉。又何說耶。且此又非地已盡耕。耕已盡善之故也。歐洲大國之提封。曠而蕪者。行一口之程。可以數遠。而剛

而播者。又不必皆盡地力也。權略而計之。將見土壤之上。尙可以受無限之母財。而使民與國交相利。然而終莫之利者。則逐末之優。必有激而使爾者矣。故歐洲政俗。前何所施。而使民於邑業大。便且市挾衆多之財。以從事於亞美之商業。至於畝治耕耘之事。雖在井里之近。有室家之娛。莫勸爲之。此則不佞於是書餘部所勉思而竊議者也。

案羅哲斯云。斯密之言。固亦稍過。至此中所以然之故。粗可得言。蓋農業恆有餘。不若工業之易擴充也。一廠既立之後。使求者日多。其爲廣供至易。農則勢有不能。故工之加母。多多益辦。農業則視地之界。審力澤以爲功。不可過也。且工之爲利。視求作供。皆歸已有。而農則有田主之征。而常得其大分。至於田主。則以土地治闢之故。由貧窶而爲素封者。亦比比矣。

又案此篇分斥母治生之事。爲農工商賈矣。繼又分商之事爲三塗。有內易。有外易。有內外易。其大指似首農業。而以外易之商爲最下。後人則謂斯密既云農工

商賈四者不可偏廢。則七者之事皆民生所必資。不應有高下之別也。苟謂事雖不可偏廢。而富國之效則殊。殊者奈何。以其所鼓本國之人功有多寡。所增本國物產之價有微鉅。是亦不必盡爾。斯密索證。獨舉北美英屬。以爲用母於農致富。奇速之徵。顧獨不見同時之波蘭俄羅斯西班牙波陀噶爾諸邦。舍農而外。幾無餘業。而皆不富。且進治極遲。又何說耶。大抵斯密品第民業。多偏於農。往往有時而過。而後人遂指其言爲失。則又不可耳。蓋地爲百產之宗。使耕牧樹畜者。斥母治業而不得贏。則宇內之財。只有此數。行且日微而盡。其他工商之業。烏得立乎。此易見者也。

原富部丙目錄

篇一論進富自然之序

篇二論羅馬解紐歐洲厲農之政

篇三論羅馬解紐時城邑利權所由起

篇四論邑業興而野業轉進之理

原富部丙

英倫斯密亞丹原本

候官嚴復幾道翻譯

篇一

論進富自然之序

夫有化之民其邑野爲通者自然之勢也。淺者以物爲市易進則泉幣鈔楮用而野之物材穀畜通邑。邑之所製造轉運者通野。夫邑非生物之地也。故其食與材皆本野而後有。雖然謂邑資於野而野損則不可。其事兩利而俱生。蓋猶分功相用之一端。各脩其業而有交養之效焉。野出其所產以求百貨於邑。其所得者使自供之。其勞費將不止於所出者。況邑之所買而去者皆野之所餘乎。故邑之戶口愈稠積畜愈富則野之收利益多。而其市亦愈廣。昔郭二三里之所出其得價與來自百里者同科。而遠者轉輸加煩。其出人均不能無所費。使二者之贏率平則近者大進矣。觀

二者之異。則知凡有近邑與之爲通者。皆野之厚利也。論交易之短長益損者多矣。至於邑野之互通。從未聞有云其或損者也。

前謂民生之事。有需有饒。方其有求。先需後饒。自然之理。野之所產多需者。邑之所致多饒者。故一國之進也。必野實而後邑供。而邑之所供。必皆野之所餘。衍而波及者。然則邑之虛實。視其野之所餘以爲量矣。願有時不然。則其邑之所取供。必從他道遠方。而不必盡由其野。此雖不足以亂吾例。而古今諸國邑野進富之不同。事往往由之。

由是而知國之進富。所以不齊者。大抵生於人事。而不出於自然。使其悉出自然。則其富之次第。必野先而邑後。野未盡闢。邑無山實也。且民之擇業也。使贏利維均。將樂農業而工商次之。蓋彼斥其所積累者以爲母財。在農其事爲耳目之所及。無風波之險。少變詐之虞。其收利之可恃。比之遠通商旅。常與不可知而難信之民伍者。相去遠矣。有所治闢。所費之財。土壤受之。不猝失也。況夫田疇之景物。心神之安帖。

倉廩既盈。吾求無缺。苟其國無催科厲農之政。則耕稼之事。人生之樂。無逾於此。吾意天生斯民。意若使之治地以自養者。故其好農。出天性也。

然耕矣。而必有待於工。否則其業煩而屢作輟。若治若梓。若輪人若爲耜。若圻者。若石工。若堯人。若爲履。皆農者之所仰也。而諸工又自相待焉。故其處也。自然爲群。而市邑以立。市既立矣。而屠醢餅師與他賈者附。附則其邑日大。故邑野者。相爲養者也。野之所乏。必求諸邑。邑與野易。得其食材。其得之數。視所通於野者。以爲率。其通之數。又視野之農功優劣。以爲率。使人事不僣於其間。凡一群之生。市邑之繁庶。必以野之治否爲高下者。殆不可易矣。

如美新闢地。餘於農。則其地有工賈而無隔。大抵皆地著矣。諸工勤勩經年。家有餘積。則相率治地。未嘗求假其業。廣其市也。故其民多由工而農。雖厚糈優利。不顧也。彼之意。以謂工利雖厚。然待售而後得食。至於農則業之。卽以得食。有主儲之分焉。故勤爲之如此。

一國書院白
國之民餘於地者則不然。地狹而欲得者多。則田價異。故工之有積儲者多。務恢其業而廣其市。始於鐵工。終於大冶。始於手織。終於以機。一人爲師。僮指仟佰。蓋比比矣。其分功也益密。其用器也益精。時至則樊然興。不待煩言也。

民之斥母而擇業也。農先而工次。地之既盡。則工先而商次。此其所以然之故。蓋同。贏利既等。財用之於農工者。耳目可及。而察防易周。故常擇此而舍彼也。獨至地產。充牣。民用有餘。則不得不通於遠方。以易其所欲得者矣。且國之商業既興。而餘衍者有所注而不壅。地則用本群之母者固佳。即不然。而用他群之母者亦甚善也。蓋使民之積蓄未充。而野有餘地。工有餘業。則藉他群之母。以通溢貨。而本群之力得專用於農工二業之尤重者。固亦此群之大利也。由此故古者若埃及若印度若支那。皆國無通商。而其民大富。曰無通商者。非無通商也。他人爲通用者。非其群之母本耳。使北美西印之民。不專其財於地著之業。而分用於轉輸。吾恐其致富之機。不能如是之速也。

是故民群既合其進富必有自然之序。首日農次曰工又次乃商賈。此國而如是者也。吠畝易而後爐冶張金木攻而後舟車運。先本後末大體然矣。顧此自歐洲之事而觀之。若相反者。每有通商日隆其地之大工以起。制作日盛其野之溝塍以脩。察其始之致然固皆由於治制。繼則治制已改而舊俗仍存。以一時人事遂矯物理之自然。又可得而論也。

案威克非曰。分功之局與易事之局本相對待。故農工商三業皆有相因之機。不得謂此順而彼逆也。即在北美新地亦有邑集既創而後近野以闢者。要之二者之事皆出自然。不見所謂矯致者。此其言甚辨。竊謂中土今日變局將以鐵軌通達爲之大因。鐵軌所經既定之後農工商三業循軌繞驛而興不及十稔而天下之都會形勢重輕徧地異矣。至於道通而民之勤者日衆耳目所觸日以殊前其智慮云爲不得不從之而亦變。此不待甚智之士而後能決也。及今閉關不早爲之所至其時猶欲循舊爲治。強方鑿而兩員柄其不大亂而敗者不其寡歟。鐵軌

既不能不開。則變法之事。不期而至。智者先事以爲防。則無往而不福。闇者時至而不及爲。將終蒙其大殃。天不爲不寒者不寒。地不爲不舟者不水。惠吉逆凶。如是而已。法之變不變。豈吾人之所能爲哉。

篇二

論羅馬解紐歐洲屬農之政。

自日耳曼與斯吉地亞兩種人擾羅馬西部。政繁群亂。拾攘者蓋數百年。民不安生。而邑野之業皆廢。方羅馬治隆。西部最爲庶富。他日城邑空虛。田疇荒圯。其國殘民貧亦極。曾豪豪盡悉籍其地以自封。地盡新主。而耕者至稀。一畝之地。動數百千里。各務廣土爲大而已。

案羅馬舊民主治。至沃古斯達而極盛。東界亞洲之波斯。北抵達牛河。循鄂林河左轉達北海。而英法皆隸之。西盡大西海。南逾地中海。而也加達埃及。號羅馬帝國焉。蓋沃古斯達挾戰勝之威。遂改民主稱帝制也。盛極而衰。羅馬之日紛自此

始曰耳曼者。始於亞洲之安息。與印度波斯同爲阿利安種。夏周之間西徙。據今德意志那威瑞典諸國地。於羅馬爲北陸。羅馬解紐。日耳曼種人之力最多。而其沾被羅馬之教化亦最深也。斯吉地亞者。游牧種民。當春秋時居葱嶺以西。今波斯地。後乃西徙。據芬蘭波蘭俄羅斯諸部。至漢與亞之波斯同爲羅馬東陸之勁敵。蓋終羅馬之世千數百年之間。所不爲羅馬并兼者。日耳曼斯吉地亞波斯三者而已。至於蕭梁之代。則峨特爲日耳曼之別種。而土耳其爲斯吉地亞之餘裔。彼角其西。此倚其東。而羅馬東西兩帝國。遂化爲今日歐洲之形勢。此其大略也。又有渾諸者。其王名阿諦刺父蒙朮。於劉宋永初元嘉之間。入歐絕達牛河以西。所向風靡。斯吉地亞日耳曼二種人皆伏之。當是時幾霸歐洲。西紀言其爲匈奴遺孽。爲中國所逐而西竄。其言或有考耶。

豪酋廣地自封。羣之大害也。願其勢亦暫耳。分建子弟。封錫功臣。則始之全而大者。繼且折而小矣。惟其國有大宗傳長之制。與用斷分律者。乃歷久無散耳。今夫以地

相傳或析或不析者是亦有故蓋使視地爲財產之大物子孫居食用享所必資則法宜降而遞析使累葉以往無畸貧偏富之憂蓋子孫自父祖視之其用享無差等也往者羅馬嘗用此法矣其地之相傳也不以長幼男女爲別異平均爲分與他財物同獨至其人視地不僅爲衣食用享之資而爲權力強弱之所繫者則其法宜完而守之以專歸於一人蓋時方據亂人而有地勢均王侯封內之民皆其臣庶有訟獄則爲之理有戰爭則爲之將禮俗彼則制之賦稅彼則收之至於外交之事有時而侵其鄰封有時而抗其共主縱橫合散惟所欲爲是故有封域之限而民居其中安危之機存乎幅員之大小析則敗矣於是乎有大宗傳長之制焉此其意與國君傳業之事豈二致哉蓋畸貧富則地可以析計強弱則國不可分不可分則有所專歸專歸矣則得不得之爲異鉅必有一定至明之制而後可以混爭也在子則擇男在男則擇長而其人之勇怯賢不肖智愚所關於家國者甚重轉無有論焉者無他凡以別嫌明微慮爭之難定故也此大宗傳長之意也

法之既行也。往往法之所爲立者已亡。而其法自若。法之始立。固有所宜。所宜苟亡。斯法爲敝。此久故之國。其中政俗。所由多舛滯。而沮其進境者。審也。今夫大宗傳長之制。所以防降弱而杜并兼也。粵在當時。固爲宜法。乃今歐洲之情。則大異矣。一畝之主人。其安固不傾。勢與接陌連阡者埒。則何爲守大宗傳長之制。而猶用之。顧其制在今。雖無裨於強弱。而豪宗大姓。譖牒之尊貴視之。則此制雖更數百年不墜。又可知也。苟舍此而言法意。將見同爲一父母之所生。徒以先後之差。必害其一人。使餘子孤露流離。無一畝之官。以自庇。長驕奢。損志業。起不平。皆此制階之厲矣。

案世家土田。大宗傳長。英國至今尙爾。其所謂斷分律者。亦造於諾曼威廉并英之日。豪酋以地予人。爲之約曰。地界某甲與其親子。甲無子若子死者。地歸舊主人。然此律滋疑議甚衆。法家以謂予地者已明言地界某甲與其親子矣。必甲無子若子死而後歸之舊主人。則當其有子而未死。地固明明屬甲而爲之主人矣。爲之主人。則可以售。可因有罪而沒官。可以租。可以質也。於是此律名存而實則

幾廢。繼而國中有地者害之。乃申之曰。約之所界。必甲與子。則其業固不可以外移。於是其律又復。而後之法家。又以術調停之。分所界者爲基羅。總屬甲。名曰斷分。基屬予者。名曰復業。其膠葛不通。乃愈甚矣。

卽如斷分律。亦緣大宗傳長之制而起。察其意。皆不過欲全有其地。而禁其業之外分。恐後世子孫。性質闇愚。抑遭逢不幸。而有分裂土田。賜予售致之事。乃設爲禁防如此。凡此皆羅馬舊制之所無。法蘭西言律之家。好以羅馬舊律傳會今制。以謂羅馬律某某條。卽今之斷分律。雖然。非其實也。

今使其地爲食采受封。收其租賦。治其人民。則既有所受之矣。固不得私以售人。則斷分律之用宜也。此亦如歐洲各國之立國盟約然。所以止有國者一人之輕舉妄爲。而使一國之人受其禍也。獨至今日。則法律脩明。凡有地者。無閒幅員之大小。其所得爲者。惟律是依。其猶用此。使產不可分。乃大謬耳。同爲有地之主。而權力之所得施於地者。子孫之與父祖。何以不同。時各有所宜。宜各有所制。而必令生今之世。

者其立產食毛之事一受制於五百年以往之人斯已悖爾察歐洲諸國其猶守斷分之律者大抵皆重門第高名厚實軍國大柄歸於食租衣稅之家舍此雖有才賢莫山自拔也夫同爲齊民此生而貴彼常爲賤已不平而非天理矣又慮其貧使必不勞而食又何說耶吾英他律皆惡世業世祿之政而立禁防矣獨至斷分則與他國相若蘇格蘭地畝參國之一皆制於斷分律而不可析售者也

不可通不可析完而守之終於世世則其地亘古荒蕪宜耳有廣地者絕少知田殖壤之家溯其業所由來率本據亂紛爭之世豪暴者力征佞幸者恩澤以有此分地焉其強有之也弱則煩於守禦強則罷於并兼所謂勞筋役志以開萊污進地力教稼穡者無其事矣及夫紛擾已定政法脩明雖時可以治地而彼又無其志不習其事使其壤之所收僅周其一身一家之費抑不及焉雖欲治地亦無其財卽令躬儉約而家有盈餘彼之所爲將待謀其新而不以脩其舊也今夫培田息土之業閭閻然斥母望羸與商賈等耳其計利消長在析錙銖此類非豪子之所能爲也飾衣裳

盛車馬宮居極崇闕陳列極華美彼自少及長所用心者悅目適情之事耳至於勞手足而盡自然之利率非所聞故無論其不爲之也就令爲之必倍其術彼將於四五百畝近居之地十倍其所宜用者而爲之如此則其所培塿者未及什一而其財盡矣今者英蘇二國之田自分封以來未易主而全者所在猶廣且多也試入其境而舉以與其左近之小業相較則吾廣田病國之說可無覲縷而共喻矣

封地之中其居而耕之者則地主之臣妾也夫培田息土之事於其主既無望矣而於其臣妾又何如中古歐洲之奴其受制於主人雖未若上古希臘羅馬與今西印黑奴之狹隘而酷烈上古之奴屬主人中古之奴與地俱地易主則田奴在焉而不可以孤獨奴昏嫁者必受命於主人易主則夫婦偕去斷奴支體戕奴軀命者國有常典特至輕耳至於奴私貨財律有厲禁奴之所出主人悉有之故治田之費必出主人奴不能也若子種若田畜若械器惟主之供而奴之所得者仰口待哺而已故奴之於田若牛馬然牛馬不能責其進地力也俄羅斯波蘭匈噶利布希美亞摩拉

維亞泊夫日耳曼之東南諸小部。至今田政尙如此。耕不以奴者。歐洲之西及西南諸國。輒近稍稍廢耳。

案斯密所言田政傭奴。皆英國當北宋時如此。降至義都活第一時。今制大體已立。三權操政。曰國王。曰封君。曰齊民。而造律成賦。下議院齊民之權特重。其制如此。故其君權雖世重世輕。而不至於甚暴。而民生雖時舒時蹙。終不至於流亡。而法則否。君民懸隔。而貴賤之等懷然。此英法二邦政體之大異者。故其變趨今制也。英易而法難。英順而法逆。易以順則潛移而相安。難以逆故決裂而大亂。此乾隆末年。法國所以有革政之民訛。而其禍之烈。爲史傳所未有也。

是故培田息土。治開濬墾之事。望之田主。既不能。責之耕者。愈不可也。夫僮奴之廩。雖其儉僅足以資生。而自其後觀之。乃較之雇傭爲尤費。此各國言計者所共知矣。其人既不得爲儲蓄。則食糜而功必墮。潦倒塞責。設求其善。必峻以驅之。何則。田於勞力者無所利也。古義大里田功用奴。而主者之利何若。觀之柏來尼與歌路默拉。

二家之言。斷可識矣。卽在亞理大德勒之世。方之古希臘。亦進者無多。故柏拉圖民主主客論。一布臘舊籍。乃柏拉圖假其師蘇格刺第主客設難。以論民主設治諸政要者。一謂國養額兵五千。不耕而待戰。則求贍此兵與其妻子者。必用至廣極腴之田。若巴比倫之原隰而後可。則知其亦用奴耕者矣。

人情常樂凌駕。而以平等相需求助爲恥。故喜用奴隸。而不喜雇功。其用雇功者。非律禁僮奴卽事情不同。用則虧折者也。蔗菸二業。餘利甚厚。可以用僮奴而不虧。則所在用之。而種嘉穀者不能。英屬海外地。凡稼穡者皆雇功。近事北美之彭斯爾花尼亞人。立約去奴工。其事之成。亦以黑奴少耳。假使黑奴甚多。將見約行。田主富人。所損不少。必難成也。蔗田概用奴工。菸田用者過半。蓋西印蔗田利厚。甲諸農業。而菸業雖遜。尙較稼田爲優。故用黑奴耕者。首蔗。菸次之。穀田最少。

歐洲僮奴之廢。不知古自何時。顧僮奴非一蹴卽爲雇功也。蓋由僮奴而先變爲法國之麥太耶。其俗始於羅馬。而英國則其俗久亡。今有舉其名而不識爲何物者矣。

麥太耶者。受子種牲畜田。具於田主人。而爲之耕。秋收復所費者而盈。則耕者與田主均分利。麥太耶逐。或自去勿耕。則復其所前受者於田主也。

用麥太耶法者。其田費悉出田主。與奴耕同。然有大異者。奴不得私畜。而麥太耶不然。有私利於所收。則望其進。非若奴之僅得所食。不問收之豐歉矣。考奴工之所以廢。大都由於田主利遜。而是國主亦害巨室畜奴之過多。奴廢爲世治中之一大進境。而其時地所始。欲稽之史策無由。往者羅馬教徒。常以此爲教宗之功。蓋千二百餘年時。教皇亞烈山大第三。有特詔教民縱奴事。然不縱者固無罰也。故繼斯以降。奴用猶四百年。其終廢者。則前二事爲之耳。奴初去主。無積聚爲母以自活。其勢必有所附。而後可以力作。此麥太耶之制所以興也。

用麥太耶。固較奴耕勝矣。然欲其出財治地。則不能。彼見田主不費一錢而坐食。則何所利而出財以培地力。脩溝洫乎。往者教士之稅。僅什一耳。已爲耕者大厲。有以沮田畝易闢之機。矧乎半取之耶。陳力見田。求無遺利。則或有之。益以已財。遞其遠。

矣。法蘭西六分其地五爲麥太耶之所耕。法田主常云以畜與農以耕作少以運載多。蓋運載之利全歸農而耕作之利半歸田主也。人情之於利其不讓細微有如此者。麥太耶佃法吾蘇尙閒見之。號鐵弓佃。吉爾白暨柏來斯敦謂古英佃名農實則貴家大奴者亦此類也。

案斯密盛毀奴耕然其俗亦起於自然。大抵地荒未墾者多而田價甚賤則其勢非用奴不可。至於戶口日蕃田價降貴則雖欲用奴耕不能。今天下之田合而言之尙是奴耕與麥太耶法爲多而領田具本納主以租如是佃者爲最少之數也。中國佃法省各不同如吾閩則授田於佃歲約分收幾何未聞主者出湊園囿之費也。

繼而有今田之制其與古田制異者斥母以庀子種牲畜田具與夫傭者之廩食及穫則如約納地主以租凡爲此者常有若干年之租限計母資子則佃者或出財治闢之溝塍園囿皆以益脩彼知於租限之中其利之必收故也。農政未脩之初佃爲

此者勢極難持。此弊今英所無。而歐洲他國尚如此。蓋租限未滿。田主或欲改佃。或云自耕。而農之所前費者。皆失之矣。就令田主背約違制。而佃所取直於理者。亦常不足。蓋常法不復佃於舊畝。而令田主估植價佃。則價者不及所費常遠也。歐洲重農。英國爲最。然亦遲至顯理第七之十四年。始立無端改佃之禁例。後此才違例改佃者。佃得復耕故田。不償取還所費之值。而受估費無定之虧損。自此法立。農有固志。但觀田主與人爭。昨涉官。不引田主主地之條。轉援佃者限年改佃之例。則律遇佃者之優。可以見矣。故英之農佃。其安固不搖。幾與田主相若。英制民歲出租四十先令。以往者爲齊民。則可以題名投銜。推舉下院議員。得此而農民愈貴。勢與地主侔矣。往往見佃者受田。未立租約。遽出財建倉廩。周旋其間。不復疑田主之見奪。其相任如此。此僅見於吾英者也。吾英政俗。此爲最善。以富國之效育之。爲商賈數者數百千條。未若改佃之禁之一則也。

田租年限悠久。而律有專條。爲之周防。此獨英有之。未聞他國有如是者。一千四百

四十九年蘇格蘭王雅各第二仿立此制以便農民顧其澤猶然者則斷分律爲之梗蓋承斷分業田以之命佃立限至短常法不過一年雖議院於此頗加補救而舊令束縛之苦未易盡祛又蘇之佃農例不得推舉議員其品流之貴不若英佃則田主之所易也

至於歐洲他邦之農政雖亦知無端改佃之病農立爲條禁不使爲山主與覬利者所魚肉然定年猶短不足以勸農功也即如法國所定者不過九年耳聞近乃展至二十七年然猶甚促不足令佃者舉大股母財加治墾以盡地力也大抵各國議政之家即皆有地之主故其議律也意有所私利則法從之而其所謂私利者果利與否其智又不足以及之也不公而貪未能遠謀彼以爲佃限過久則地主受束不能逐利加料而不悟時短則佃者不出母財以進地力地力不進則地利不興而主者之利亦薄彼固未嘗統前後以爲計也

古俗佃農之於田主納租矣尙有無名之徭役主家有事卽隴呼之此之病農不言

可喻。輒近蘇俗。變者孔多。於此則凡不約者。個皆不供。故數稔之際。農困稍蘇。而田業亦進也。

田主一家之徭。其病農已如此。若國中徭役。則有甚焉者。開通大道。而時脩之。此爲田農專役。諸國皆然。雖輕重有差。而至今不廢。王如出師。若王官過境。車馬餼糧。農者供之。其價定於供。縣之吏。不得異詞。歐洲君主之國。以此政爲厲民。而廢其俗者。獨吾不列顛已耳。若法蘭西。若日耳曼。皆至今尙行此令者也。

徭役之外。有征求。其無定程。而繁重。與徭役等。古田主多有地封君。其於國王。亦嘗苦徵求無藝矣。而獨任其王之施於己之佃農。王取於諸封之佃。名泰理稅。泰理稅者。臣虜之稅也。（說詳部戊）是稅行。則大損在田主。今法國猶有之。觀於彼可知古事矣。其意若謂此不過分取農人贏得耳。顧其征之也。則第其隲之牲畜。罔節諸可見者爲差。此何異於懸厲禁以沮農者之出財治田乎。雖有積畜。將避匿藏弃之。不暇。其必不以廣田畜。比舍宇治耕具明矣。且泰理之稅。被者恆以爲辱。惟佃乃

家之不得齒於齊民之列。舊家富民於是皆相戒勿爲佃。故泰理稅行使有財者相率以遷南畝。地力之衰又何怪焉。往者英固有什一之征。有十五而一之征。其法與泰理同。而農害以大病矣。

夫厲農之政其多如此。則無論國中刑政寬大公恕爲如何。民生之自由身家之可保爲奚若。而田疇之業不蒸。持佃農以與有田自耕者較。其情猶資財以買者。資財者常累於息。佃田者常困於租。累於息者得不進。困於租者地不脩。雖謹儉爲之。猶不逮也。況佃農品地常卑。自歐俗言之。有下於工賈者。至顯商工主。愈非佃農所得比肩矣。富者之擇業也。常趨邑而棄野。益財治田者。其財必積於農。由他業移則絕少矣。國之進象。非農莫由。歐洲君主之國。不鄙農業者。惟獨吾英。餘則荷蘭瑞士最優農。而二者於今皆民主。

其他病農耗國之政。古歐洲尙多有之。受其困者。固無閒貸田於人。抑有田自耕者也。約舉其一二大者言之。則如禁運穀出口之例。幾於各國皆然。又若境內通商。凡

地畝所產者皆立種種謬法或禁統收或禁蓄積或禁遏糴利視若美惡行之皆病民則篇於羅馬禁運穀出國與獎運穀入國之條其移教於義大里之農功何若固已賂及之矣夫義爲歐洲最腴之壤而在當日又爲共主之所都閭者爲之其效尙鮮至於次腴之壤而出穀之禁與種種謬法行於其間其病農耗國之效何如則豈吾人所未易思議者矣

案自古無無弊之法方民德未進民智未宏則法之爲弊尤衆故一法之行皆有其便不便者緩急輕重則有之矣曰無不便而後可行此何異庸醫立方必求無毒之品其殺人乃愈多也知時審勢之士爲國家立一法調其異已者必舉其不便改之不知擇禍務而行法者曰擇其輕者爲之非得已也中國自秦以來其立政大體多與羅馬李年相若知防奸塞弊矣而不知有違且大者之邦本利源與所塞所防者將俱去也即如愚幸科之專權矣而不知國有緩急之無重臣郡縣之官不用土著矣而不知吏將視任職如假舍六部位同官等至於六人而不知

官事之推諉而叢脞三代後法大抵以禁非有餘而以進治不足卒之禍常發於所慮之外弊即伏於周防之中而財力匱乏人才消乏有欲圖挽救而不能者矣可勝歎哉

篇三

論羅馬解紐時城邑利權所由起

當羅馬帝制初際時歐洲城邑之民其利權品地與田野之民蓋同初希臘義大里爲民主合衆亦有城邑顧其居民與後者大異合衆城邑其中皆有分地者築城聚居爲相保持計耳至於羅馬解紐有地者多即野築砦堡以居四圍皆已田而佃者附之爲戰守耕役焉至其邑居乃爲墟集工賈萃之猶爲王公與有地者隸也繼乃權利漸增邑有約書以爲永守觀其約所云云可推其初此之何若矣如云邑民女子聽自主嫁人不必請於地主已有積畜身死之日付其子孫或親遺囑分人主者所不得奪可知未有約書之前其人皆地主豪家奴僕與野之佃戶無異等耳

凡此皆貧寒下戶之民持貨待鬻過市趁墟若今牽車負擔者然古歐洲國俗於此類行賈民遇其過境若橋梁津關若墟市若陳肆坐列皆征之蓋猶今亞洲雜稅諸部俗矣吾更謂之界稅橋稅落地稅攤稅也其國王及封君有力者得於境中業賈者以令豁免之然必歲有所貢納賈得此者雖品地猶污得稱自由賈人自由賈人者不過易貨征爲頭會而已英國部邑中古冊籍猶載某肆某賈歲納之數名保護捐者即此稅也

邑賈賤業也然其發舒自由方之野農爲蚤矣蓋由前之俗久之而通邑工賈無人
不納頭會頭會徧矣久之而王設僧長使總收之制無定之數爲定額歲爲經租爲
僧長者（卽中土所設牙行總董）則市集之監或他富室邑中多財有畜之工賈
起而自充之而相聯爲保固富賈爲僧長王之所便也則聽之令每歲總邑市租以
自完於主藏者如經數而止不更設吏催督之免於吏之催督者當時民所最亟而
惟恐失之者也

始僧長之承邑租也。若佃農之承田然。有年限者也。久之而得相承爲產業。歲納經租。不增減。邑既永永納租矣。則其民亦永永爲自由民。免關市征及諸徭役。且其租爲通邑之所納。則居是邑者皆自由。民不區某戶復某戶。未復也。故通而名之曰復邑。居復邑者。皆自由民。自由工賈也。

其便利。如嫁女自主。有積畜得傳子孫。若遺令所欲予者。似皆復邑之民而後享有之。邑未復。民身獨復者。嘗得此否。不可考矣。吾意其得之。特無所徵耳。總之無開身復邑。復得此者。皆眞自由平民。超僮僕奴隸之列。非但若前所稱之自由賈人已也。邑復矣。彼民之所得自爲者。尙不止此。彼方聯以爲一體。而一切之制度興焉。一攷英國邑集其民聚而不合者。如中土之鎮集。曰拓溫。有聯約制度者。曰柏拉。其有大教寺爲教主所居者。曰錫特。其有封國若衙署者。曰沙耐。曰噶溫提。一得自推擇邑民。一英名馬芝斯脫特。不譯令宰者。以非國王所命也。一立議曹。一蓋猶中國之鄉約所而權重過之。一頒約章以治邑事。建城堡。習民兵。爲守禦備。非常有警。則登陴。

更戰守其訟獄小者邑長就平之。大者而後憑於王之理官。英之所予邑民者。僅如是。若歐洲他國。其國以予邑民者。猶多且大也。

古歐洲之君。其有大貸於民者。如是。夫謂既設僉長以收市邑之租矣。則必稍假便宜。昇權勢。使有以率其頑梗者。此說近也。時方據亂。設案未措置。必求之於王之官吏。而後能得。則事之廢而紛者衆矣。顧吾所不解者。市邑之租。年月萌長。不必勞神費財。可以收方將之利。乃其時邦君獨肯定爲經人。不復增廣。而又惠然聽民聯體立制。儼若民主。於其邦域之中。而不相疑忌刻。懷者是可怪也。

欲知其所以然。則當據亂時。一國衆建之小侯甚衆。牙歎棋處。敗漁其民。蓋歐洲之中。無一王焉。力足以周其疆宇。保其黎庶也。民既不能托命於國律。其自救之術。有求庇於豪家而爲之奴隸。抑連體合從以相保持已耳。無論其爲錫特與柏拉之民。析而言之。皆匹夫也。獨至鄰伍合從。出死力以與豪暴者抗。則其勢稍厚。未易摧矣。豪貧有地之家。其意常輕齊民。以謂彼與縱弛之奴無異。貴賤既懸。不相爲類。而工

賈之富實。又有以動其貪猾。啓其戎心。慮寡否耳。誰復哀此無告者。民之疾視豪酋。固其所也。願王之於群豪。亦甚惡而深忌之者也。至於齊民。則有輕蔑而無疑忌。於是同仇相資。王與民相楮柱。以待群豪。民之安集而自由者。王之利也。欲其安集而自由。必畀之以擇長老。造令約立城堡。習戰守之便宜。蓋聯不齊之民。爲以一體。非有制度賞罰行於其間。其勢不集。雖聯猶不聯耳。故其所貸者。誠不得已也。市租定爲經入。使民知其後之必不復加。而諸邑之心益附。邑民附而王之勢乃不可傾矣。大抵歐洲古王。其與諸豪最爲阻酷者。則於都邑之民尤寬大。如吾英之約翰。邑集工費。蒙賜最厚者也。法之斐立第一。於諸侯盡失其馭。至其末年。其子路易與國中諸紳甫長老謀。所以控制之術。則以二術共之。一變理訟舊制。縱民得自擇邑長。設議曹以治邑事。一令邑居民起鄉甲習兵。將以邑長。王有調發。則應之。法之有邑長。設議曹。自此始。餘若日耳曼之蘇阿巴王。亦以此時。一南宋景定間。一許群邑以聯約之權。號號綱維公會。職制相保。王前之策。亦合垂四百餘年不廢云。

郡邑所起鄉甲。號密里沙。當此時密里沙之強盛善戰。愈於國兵也。一令傳呼萬旅。遂集。人懷怒心。各自爲戰。定爭排難。群侯畏之。若義大里若瑞士。皆以去王都遠。遠號令沮梗。於是所在邑集。爭起爲民主。與其地之諸侯抗。勝之則責令鋤砦堡。去守械。入邑聚居。與齊民齒。瑞士之蒲納若他大邑。其故事類如是。若義大里諸邑民主。當以十二三期之際。密里沙起者尤多也。

案今歐洲各國密里沙猶有之。則以額兵過費而耗國力。故爲此使民皆知兵。國有大難。人人能戰。蓋寓兵於農。與中國三代田賦。唐府兵之制合矣。亞洲日本亦如此云。

若夫英法二國之王。其操柄雖有時而不張。而廢墜則未嘗有也。故其國郡邑無自立爲民主者。然其民之勢常強。故使市租既納。非百姓所詣者。其王卽有急。不得橫加毫釐之賦。國有大事。則王詔通國郡邑。若柏拉若錫特。各遣專使詣闕下。號代議員。與有爵及公卿教長雜議。以定所出。所以餉王者。顧齊民與爵貴者恒持異同。而

王亦樂用之以抑群侯殺其勢此上下議院之所緣分而歐洲國中諸柏拉所以有
推擇議員之制始也僅以定賦今則於一國事無有不諮問者矣

案觀此知歐洲議院之制其來至爲久遠民習而用之國久而安之此其所以能
便國而無弊也今日中國言變法者徒見其能而不知其所由能動欲國家之立
議院此無論吾民之智不足以與之也就令能之而議院由國家立者未見其爲
真議院也徒多盈廷之莠言於國事究何裨乎然則彼日本何以能之曰彼日本
之君固新自無權而爲有權者也權孰與之曰民與之其民之得議不亦宜乎雖
然彼日本之議院至今猶未爲便國之制也繼今以往漸爲善制則未可知耳

都邑之民優游安集矣齊治漸廣無相侵奪而其居田野者其生之狹隘酷烈如故
也衣食裁足斯爲幸民益求盈餘則侵牟者衆夫民惟既處既安全而有所自力
者夫而後更奮以求其餘此文飾便利之饒所由興也故若古歐之治民之由質而
文也邑先於野何則民由質而文必始於生之有餘故也當是時歐之野民稍有餘

資必謹藏弄。乘閒伺隙逃爲邑民。其時法制於邑最優。山野逃邑。亡命一歲。不爲主者所求得。則終身復。故其時野之蓋藏。歸邑若水之趨壑也。

夫謂邑居之民。衣食物料。必野焉出。是固然矣。然使都邑所居。並大海之側。則可漕之河。則野矣。而不必其近而居其周者也。周流通達。遠方之物。將來萃之。特視其邑所製造而運致者爲何如耳。如是都會。日月之際。隱賑無倫。而野之居其周者。猶燕然弗然可也。野之與是邑爲通者。必極廣遠。而後足以供其食與役。故野以近都會而富者。古恆有之。若古希臘若哈刺森之富。阿巴錫智之世。（自唐天寶至南宋末年）若埃及未爲土耳其并兼時。若西班牙當莫路戈爲政之日。其邑野之形。盡若此矣。

古之以商業致富者。其義大里諸邑最乎。（時羅馬東邊分爲二帶。一都土耳其。一始都義後都德其。存於義者僅羅馬舊都已耳。）文物之國。環地中海。而義大里爲之樞。若衆星之拱極。十字軍者。古今至無謂之兵役也。殘民傷財。不可應計。餘國

被其毒者而義大里受其賜一洲之兵雲委鳥集群然以光復聖家爲號一十字軍始於宋紹聖元符之間以耶穌耶路撒冷境喀回教域中而教徒被侵掠教皇覺和利伯復聖家而耶穌教諸國從之兵連不解近百年也一而威匿斯結奴亞碧沙諸步多船舶爲載運兵旅輻重焉當是時義大里諸邑若司十字軍之轉運也者而其地以之富

民居都邑而業境外貿易者則通高等之熟貨與華飾珍異之屬於數國間往往盈握之微土物傾圯倒廩而後惜之民侈心日滋如此故當是時歐洲商業可二言盡也華國出其精質壤出其粗而懋遷行焉英倫之蠶易法蘭西之酒醪伏蘭德之紙紙波蘭之麥易義大里之毯法蘭西之絲帛其他可以推

民生日用由質而文由粗而精者其勢而通商之事有以開之始也致水土物以求於其外其他恆貴及其求之者多則則倣之事起而於其國自製之矣故羅馬解組之時製造邑業多興於西諸部

顧此所言製造之已業乃以地所專擅民所專能而成貨馳遠者言之非常物之謂也蓋國大民蕃雖至僇之群於民用不能無自產者若布帛若宮中之械器齊民所有什九皆其國所自登此在無製造之貧國尤多而在擅製造之富國轉寡每觀下戶貧民所衣者異邦之氈罽所用者遠取之陶冶則不待問而知其爲宮俗名國矣製造工業興以業名其國貨行遠方者察所由起有二因爲一曰天事二曰人力而其致於民各異則先自其地所本無而山於人力者言之巨子富商見外國奇物異製謂學成足以致鉅富則斥大母集衆力名爲其地興利源焉卒之事勢不同成者十四不成者十六故如是之製造必後通商而生此如古義大里北部路加之絲業興於十三棋逮一千三百十年爲暴令所逐（當元初正瑪可波羅游華時）一時織工去其地者九百家而三十一家適近國威賤斯所告其官願爲威興絲縷之業既受厚而得資助於官者甚衆則用三萬指爲其事他若伏蘭德之罽業其興特古吾英額理查白之代乃由伏而入英法國理安英國倫敦北城之織絲業皆本無者

凡人力強致之工業其物材無土產者常致其物材而效其成物卽如前之路加其成帛皆用他國絲縷十六棋以前義北無蠶桑者蠶桑之人法理安當其王察理第九之世然至今猶用外土絲英倫敦北城同此伏蘭德始爲罽用英與西班牙蠶也英罽亦皆用班蠶而罽縐精行彌遠凡如此之工業其興也非由自然必一二有力者倡爲之繼而日廣其地多瀕海沿河然亦有時見於內地者則視其地利與倡者識力所及以爲之

其由於天事之自然而不由人於力所強致者則又異是大抵群治既開其中民生日用之所資與夫居服嗜好之爲作雖在陋邦皆有不漸進而自進者天成之工邑其所治之物材恆產於域中其地之所居不必若前者之近水雖漕輓斷絕不足害其業之興也往往其土甚腴耕稼既興民食饒溢而又以漕輓之不易地產有餘者居其地而不外流於是乎以其地生事之易供遠方執技之工不招而自集成貨求食於他所爲饒既有以勸其巧力矣其藝乃日進而所易亦自豐故客工之於主地

有相得之用焉。地得工，其所餘之食，無待於遠輸，而不至於委積。工得地，其專家之巧習，日益上，而有所與酬。農得工，而生貨貴，則本業不病。其畎畝之膏，益滋。工得農，而熟貨流，則末業以脩。其高曾之規矩益密，其始之成物，不過取邑里之周已耳。而物良聲疾，則遠所之民，爭欲得而實用之。夫生貨與雖熟而粗者，非待漕輓既通，不能行遠也。惟熟貨之精者，能之。盈握之物，可卷而懷，而其價則推因連乘而後埒之。錦繡之段，重不過數十斤耳，而易數千斤之粟。是數千斤者，皆輸與治者之所食也。故內地工業行遠之後，則前此農業之所饒衍者，得此而徧達於四方，特形化而所附者殊耳。然而工之興，必待農收既富之後，不若前之生於人事者之後於商業也。此若吾英東北之粟底思（精羽毛皮革之製造）哈力發士（以氈氍吉貝之業名）薛非勒（以月劍名）蒲明罕（中國所用棉布大抵產此）武累罕布敦（以鐵冶名）凡此皆興於自然者。故曰天成工邑也。然考近世紀載，工邑之興於自然者，其精進廣馳，皆不若工邑之興於人力者之速。蓋自然之工邑，其興盛必

後農業而通商宏大工政日脩者其勢又可使農業之日上而不自知其相因之理爲微渺矣。

篇四

論邑業興而野業轉進之理

都邑之工商業進而富厚則其地之野業必脩者可言之故厥有三端銷場日廣一也此其利不僅見諸附郭之鄉野而已凡與是邑通者將皆驗之然遠近有轉費之差則近者固勝商利歸田二也工商邑居而致富聞有田可買置者則莫不勸爲之人情隱賑之餘樂山地產而地之歸商有尤便者商爲發貯居邑之人析利最精有所更遷謀定後動非若有地世家徇慈出財常無所收二者皆成於習而以之主田利害遂判故商之析利幾秋毫而其發也若猛獸驚鳥雖數萬巨費斥則斥耳世家財出不返而興事多徘徊審顧之情不能如是之決也生財之道無分本末皆條理計慮精神三者用而後利見此世家所萬萬不及商賈者也故商主田產則地力必

增田主各恤其私而國有進富之效也終之其三則地惟臨賈製造之業大興而後
文物聲明以進文物聲明進者治俗整齊民生安集之謂也游收耕稼之民當苦征
徭軍旅隸於地主奴使而虜用之故邑業有造野業其大者不惟國富攸關而化之
進退繫焉然而知之者寡矣輒近談治之家先獲我心者獨休蒙大闢一人而已
世家之有地也動逾數百千頃乃刈乃穫積倉萬秬其有餘如此而其國外不與諸
邦通內無精絕可喜之工業其所有餘舍以食田畯養游閑無所用矣古俗其餘粟
足供百人者門下著百人之籍足供千人者門下亦著千人之籍世家主人其前後
左右大抵皆食客耳無功而祿將惟主人之所指揮吾歐工誦未興之世自國主以
至封君凡號富貴者之所供億其浩大有非今人所能致思者威明斯德殿者吾英
最廣之宮居也乃威廉魯拂王宴客之處彼未嘗病其窮大也史言柏榮安瑪儿榻
不足則以結莞席地以待客之後至尊食者又瓦爾域一侯爵（英第二等爵）日
食不下三萬人雖其詞誕然其數必至多故其言若此即今蘇格蘭世家所爲尙有

然者此其事豈獨英蘇已哉凡國工商無聞而獨以農業富者莫不然矣。西師波格爲吾言親見一亞拉伯豪舍驅駝牛入其都市當晝傳食滿城行人乞子皆席地敷坐與共食也。

其家甫田廣陌之中所有之佃丁雖勞力後食與其奴隸食客不相遠耳。田受於主人舉家衣食惟此焉依而所納之租僅僅名存而已。英律爲此種佃民爲恩許之佃蓋視主人喜怒以爲容遂也。至其納租則歲二先令半至於一犢一羔皆可以將其意凡以視感恩不叛而已。此蘇格蘭山部所在多有之。夫使國有成俗謂境內所產者必於境內盡之則一主家收成既廣其所養養者往往徧諸數十百里而遠不必哺餵戶庭之中而後爲門下之食客也如是之民其一身之飽煖婦子之酣嬉皆惟主人之爲仰又何怪他覩穆阿自處如奴婢乎。

且由是而小侯衆建之制成焉。夫羣侯者其始皆擁地之豪已耳以其服從之衆也浸假而隸訟質其成矣。浸假而戰陣爲之師矣。時平則定約束以使之相安有事則

出指揮以伐其所仇他人無此權力而彼獨優爲之何則積勢臨之漸也就令其土有王亦不能遽奪其勢王不過小侯之長耳雖爲群小侯之所嚴事然使入小侯之封內取其民之干憲者而誅之則犯其合從相死之勢而威賁事難故其勢不得不獨之以與其地主刑之事如是兵之事亦如是也

案考歐史知歐洲諸種大抵皆自西域安息流徙而西其先皆游牧種民降而後有耕稼隨畜薦居營生日衆其建國本始之事如此非必有錫土胙茅之事若中國也希臘之制爲合衆羅馬有藩鎮而無建侯至於中古宋元之代國相併滅於是論功行賞分壤而食其租蓋若湯沐食邑矣顧分土因而分民於是乎有拂特之俗拂特者衆建之末流也一國之地分幾拂特分各有主齊民受壓其中而耕其地則於主人有應盡之職役而莫大於出甲兵應調發之一事用拂特之制民往往知有主而不必知有王故地大民衆者王力不足以御臨之也英倫王勢較尊通國所共戴故其中拂特之制最先廢（順治十七年）若蘇格蘭則略後矣

（乾隆十二年）而法國群貴屬民尤深其執持亦尤固則因之以肇乾隆五十四年民變革命之大變世變之烈古未嘗有民怨其上其報之也但貴卽足以死其軀不問有罪無罪也則拂特之遺孽自無有存者矣而德奧諸土其制轉綿綿延延至道光末年而始廢亦以見變制之難爲也然世進而民智開則食租衣稅之家有雖欲如前之東溼而不得者拂特之制雖名存而實則異古久矣

然或謂吾英鄉官聽鞠之制爲拂特律之一端者乃失考而大誤也拂特律之行晚而鄉邑自鞠庶獄之權先之蓋數百千年且不徒訟獄一端而已卽如募戍兵造園法立約束以自行於其鄉者凡此之權皆有地之民所前有者撒遜之封君其權不亞於威廉功臣也而拂特律則自威廉英而始有其制法蘭西拂特律未用之初其封爵食采者權力所持甚大蓋其制生於地產之自然各國地產之分旣已如是則鄉官地主之權力必重於國王者自然之勢也近事蘇格蘭洛加巴部有葛末倫者不過一公爵家僕耳非令非尉身未磨一命於王朝而爲其地平訟獄理庶政者

幾數十年而民安之至一千七百四十五年乃率其鄉八百戶以歸廢王雅各而敗焉國俗之流傳而民安於所習如此

考拂特律之行也勅爲約章載諸盟府乃所以抑有地諸封之橫恣而非所以益廣其權力也其制自國王泊夫最小豪宗皆立之等差以相系屬而皆有臨御服役之事以維之有地封君身死紹其業者年未及格（西例以二十一歲爲丁）則其地由最近之屬長主之（蓋猶中國古之方伯）爵尊地大者比例而升故公侯大封死而子弱者其地統於國王既爲主其地收其租矣則於嗣子有保傳之責督其學業主其昏娶不如是者爲違律此制行國王之柄稍重而郊野小民未嘗受其益得善治小民疾苦生於田制備耕之間其弊非拂特律之所能革也督責統治之柄在國王則時輕在小侯則時重已成尾大不掉之局故其制雖用而群侯之暴橫如初揠伐攻討殆無已時其上陵共主者亦時時有之田野多被兵之事欲農業日進難矣

天下有其始若甚微而後效則至鉅有常智所視爲無益而用之反以有功此事理之隨所以非師其成心者所能察也古者拂特之敵豪暴侵欺窮黎無告雖有強王其救之也不過一時非無明約盟其相維也終於叛散而孰意此歐洲絕久深漸之暴俗所欲變之以兵刑而不得者乃轉以商賈工藝之微卒有以鋤其兇類而不變乎蓋世之所以有據亂者以有地之家擁衆爭強故也彼之所以能擁衆爭強者以其所喚咻哺飼者之多也喚咻哺飼者之多以積倉儲糧聚而無所於散也自商旅之既通製作之日進也彼乃得斥其所有餘以贍其耳目口體之欲擴困倒廩所易者多不盈躬之物全以自奉而非隸其宇者所得分也夫厚自奉而不與人同者有欲之民皆如此而居上者爲尤故向之施於其衆者積而不流不得已也一旦有術焉能全其所有者私於一身不以分物即盡一家一年之租賦經入而爲之所甚顯也一轍之繫十家之產一帶之鉤千夫之膳不以爲費且以爲夸而向者爭強擁衆之權與俱去矣此商工利興豪暴力征之風所以不待鋤而自絕也今夫斥倉廩

以養人者俗之所歸也。靡不貴以致淫巧者世之所非也。顧救民水火之功終在此而不在彼。然則天下事之繁賾理之蓄變夫豈師其成心者所能詳審而諦論者耶。必謂商工未興豪富者有養民之惠百貨日出浮末者奪民食之資又非極摯之論也。今使一國之中無外至之通商矣而亦無精巧之工作則歲取十千鎊之粟之家委積紅朽勢不外流必以贍千家之食而後已食之而靡所與易則其人固皆主者之僮隸也。至今日之世此十千歲進之家其所飼者或不過二十夫。甚且一家之中所雇者不過一二走卒供使令奔走已耳。然而彼之所養者詎可謂止此二人二十人哉。夫苟以類推之則今富人之所費同古其所波及而潤者且過古之千家而莫不及也。夫斥其積蓄以易工商之貨斥者固多而所易者固微也。而是至微者其治與致者之手指則恆至衆也。值原於功不衆其值不能如此貴也。價之酬也其近而可見者所易之物其遠而不可見者作治運致之功庸與聚財廢著者之贏利也。特局遠則利之分繁而事之變隱耳。此作治運致者之庸與聚財廢著者之贏利不

必皆仰之一家也。其所得於一家者，於其物之全費，或什一，或佰一，或仟一，甚者萬分一焉。其爲利之仿如此。利仿，故雖受之而不必以爲恩。雖斬之而不必以爲怨。恩怨泯，故其勢雖相待而若其不相待。不相待而民乃自立。民各自立而文明之治，乃可言矣。

古之局常分以爲言。今之局必合而後見。古之豪家以租養人，其所養者必其家之佃傭隸僮，各爲養者也。今之富人以租易貨，其所養者工匠鬲旅，合而共養者也。苟噉其多寡，則以酒肉餽餽之奢而多糜。故今之所養者常多於古。若獨取一家之所及與一匠之所受而言之，則其爲分又至薄也。交易廣而分功繁，一匠之所資生皆待百千家之所出者而後集。雖蒙惠養於諸家，而其數既多，非一二人所能爲貧富苦樂，而不必有所專仰者矣。

奇說之貨交乎前而富者之嗜欲日滋。於是乎昔之所謂有餘矣，浸假而日形其不足矣。不足而求遂其欲，則昔之無功而索者，其數不得不損損之又損，俄則虛無人

焉。且此不僅見於寄食者已也。卽田隴之佃傭。有勞而食者也。至是亦將節其可已而留其不可已者。佃減而出間之屋廬亦稀。可耕之地闕。而耕者則取足以周事。未容濫也。於是乎有限田之事。而眞租徵焉。眞租之初徵也。必大過於平日之經數。順歲入進矣。而欲得之待償。往往過之則不旋踵。又形其不足矣。不足則其責於租者將奢。過於未治之田不腴之壤之所克給者。過而猶徵。則必施濬發墾培之費於其田而後可。主者不之出而欲佃者爲之。則必展累年之限約。主者必不易佃。使所斥之田操券可復。而後佃者乃勸爲之。此農耕人田長僦之規所由昉也。夫耕他人之田而長僦之。其去己產特一間耳。厚費樂施田疇以沃。此農業之肥而舉國之大利也。顧深迫其始。乃由於主地者侈心之萌。與日通奇物者之有以鼓其嗜欲。夫仰豪之鼻息。而一切惟所命者。特寄食之徒。與耕其田而納名租者耳。既予眞租矣。則雖在恩許之佃。彼田主不能惟所欲爲也。主佃有交相資之道。而佃者既以價受田矣。則不能徇主人而置其身家財產於不顧也。至於約爲長僦。則主佃勢均。而

耕者純爲自由之佃戶。雖至微之供億。至輕之徭役。舍僱約所諾。與夫國憲所垂之外。彼此皆不得增毫釐焉。

彼耕其田者。既爲自由之佃戶。而寄食者。又盡去而無遺。則其家雖有名田而無擁衆。故其勢不足以爲暴。而其境之刑政。莫之傾而平矣。教經舊約。載義唆以饑餓之餘。求一飽而自斃。其與生俱來之權利。今拂收小侯之嚮此也。非以掠饑也。非斃於壟漿簞食也。乃嚮之於既富之餘。嚮於耳目既好之近。晶熒譁囂。孩穉所欣。非長者所宜近者。而諸豪坐此自褻其所傳之羽翼。以降等於編戶之民。斯足異已。然而田野之民生安集。而刑政平。能與都邑俗均者。其端在此。

是故嚴宗法。重譜牒。先疇廣遠。祖孫父子相承守。垂十數葉數百年而勿墜者。有之。必重農而輕商賈之國也。若蘇格蘭之山部。若南英之衛勒斯。此皆晚通。故其地世家至今多有。若亞拉伯之國史。有某可汗所自葬者。遙譯者徧數國。取而觀之。舍譜牒而外。無他紀錄焉。則其國之多豪宗。可想見爾。夫固有富民。其歲入舍餼養黨人。

無他道以散者則其量入爲出易耳。雖甚豪舉必不施過其力以自累明矣。獨至身處五都之市。麗都奇詭。物物足以蕩心。則煩費之興。不知所屆矣。何則。富者嗜欲無涯。而自惑情勝故也。是故家於尙誦之國。身席祖宗之餘資。雖其先有明訓。其國有禁條。所以勗節儉戒僭奢者。甚至顧其財不恆守而易糜者。勢也。若夫僥簡農牧民鮮外交之國。雖無禁令誡飭。其財之聚者恆留。若亞洲之韃靼。天方遊牧種民。類多若此。且其財幣主於麥酒牛羊。亦無繫而不食之理也。

無形之世變。起於野邑二民。顧彼二民之所爲。初何嘗以群之休戚概其念乎。世家之子。所逐而遷者。不過求遂其童騃之嗜欲。而商之轉物。工之成器。雖未若富兒之可哂。亦不過鬻財發業。追時好以取利資。是二民者。一以其愚。一用其貪。以彼所爲而遂致必然之世變。如今則所不及料者也。

是以歐洲野邑之間。其海富寢昌之序。有與他土微殊者。他土野闢而後邑興。歐洲則邑興而後野闢。其相爲因果之次第矣。顧其序既非稟於自然。將其效亦常遲而

難恃。此察於歐美二洲進富之殊。可以見矣。歐之富由工商。故其效速。美之富由耕牧。故其效速。歐之諸部。其戶口自倍。非五百年不能。而北美諸屬。二十五年而倍者有之。二十年而倍者亦有之。大宗傳長之制。斷分永業。諸律令行。則田疇完而不析。有大封而無小町。夫小町者。田事所由精。而地力所由盡也。家有數頃之田。肥瘠澆鹵。雖微必知。水利土宜。無舉不得。當其輟耕自勞。其心若人地相倚。一合不可復離也者。愛情中興。不徒治之不疲。實亦寶之無斁。是故諸農之中。小町自耕之農。其勤苦巧慧。收利之多。常爲之最也。自土田不可披分。故隴畝之待售者寡。供少求多。卽有售者。亦皆率權貴庾之重價矣。價重故租不齊息。況夫益之以培田之費。履畝之獨。與夫費之緣田而起者。凡此皆役財取息者之所絕無者也。是故吾歐之民。家有微貲。斥以買田。厥利最劣。其或半生勞勩。薄有餘財。雖知利劣。終以營田者。大抵欲長恃無失已耳。至若強力少年。斥二三千金之費。不治他業。不習他藝。而用之於田。業農功者。其後此之所收。誠亦可以無憂而自立。獨其他厚利高名。所用其財而可

冀之於餘業者斯無望已。且如是之人使其力欲企爲田主而不足則亦俯爲佃農而不甘。故總而論之田完而不披則其轉於市而售者寡。售寡則價昂。價昂且使母財之用於田疇者少。用於田疇者少則其國之農業難以滋增矣。獨至北美之事則大不然。人握五六十金之資即亦可治樹畜。購荒地而治植之。用財之利莫優乎此。無間母之大小也。役財治生由此揚名發業亦由此。其用財利害與歐倖馳故富庶之效遂懸若彼耳。吾非不知北美初國民墾地曠其田價幾同無物。此不特非歐之所得同。卽在他洲地各有主者亦不能也。吾所欲言者以謂但使大宗傳長斷分永業之法變焉。令父之傳子。遇有田業平均爲分。則既析之餘業輕而易轉。易轉則入市者多而田價平。田價平則租可齊息。而母之爲地斥者其利不減於他業。財注於地則農業日蒸而國殖亦進。此則操柄者所當圖利者耳。

案所謂民治小業各自有其田則農事以精。地力以進者斯密之後持此議而能徵其事者實繁有徒。而其效於法國爲尤著。法之國力大抵恃此俗耳。顧亨利那

縣論五謂使縣令得私其百里之地則縣之人民皆其子姓土地皆其田疇城郭皆其藩垣倉廩皆其國帑爲子姓則必愛之而勿傷爲田疇則必治之而勿廢爲藩垣國帑則必繕之而勿損自令言之私也自天子言之所求夫治天下者如是足矣此其言與小町自耕地力以盡之理乃不期而闇合計學家楊亞德謂其效如幻術可轉泥砂爲黃金或又謂國行此制者野無惰民國多美俗亦可謂傾倒之極矣然自汽機盛行以還則縵田汽耕之說出而與小町自耕之議相持不下謂民日蕃衆非汽耕不足於養而汽耕又斷不可用於小町散畦之中蓋世局又一變矣事固不可執一以論時宜也

吾英工商之業其興盛冠諸邦者此不徒人事之能爲亦本之天然之地利耳土壤饒沃海濶其周港汊出入如犬牙可消之水隨地涌發交流其中通國之地去水涯無甚遠者故其國於通商航海之業最宜施巧成器者朝登於肆夕馳四方故收利遠而業之益精易自額理查白臨御以來國家議令垂條主者皆兢兢然以獎進保

持工商之利爲要旨。故國家政法於工商最優。亦非歐洲諸國所能及。是以二百年
之間。商工之進。能以暴達。大然如此。至於田野之業。固亦日新。而其進也。當後而退
未若已業之踴躍也。祖理查白以兩英之土地已粗闢矣。至今地之不耕者猶多。即
耕矣。亦強半不盡其能事。國之法。固亦時有以補助而勸導之者。如成非餓餉。運
穀出口者。不獨無稅。且不惜重賞。以獎外輸。中政之嚴。有以外穀進口。競農利者。則
加重賦以困之。至於運販外來牲畜。則愛爾蘭而外。舉禁之矣。然則治田之民。於耕
耨。墾。地產中民食之兩大宗。幾於罔收其利。而莫與爭。雖獎政禁令之施。其終皆
無益於民。而爲乘成者之妄見。然上既右農。而重野業。斯徵稅之民。生業以之樂
利。身氣以之發舒。而各知其所處之非冗業。此其所謂關爲尤鉅耳。自大宗傳長。教租
什一。與夫斷分永業之制。既行。勸耕勞民之事。能如吾英爲已極。而乃極所能爲。吾
士田之治闢。止於如此。假令爲上者。於農業漠然。不以置懷。獎助之政。一無所施。農
業之汗。猶如洲內諸國之俗。吾英田事。又竟何如此。未易以一言決也。自額理查白

之世至今日月轉丸爲時過二百載矣物盛而衰回居今之日固人事所宜稍變者也

案獎禁諸令皆英國今日之所無民智日開知此事之無益則漸爲除之至同治間大略盡矣牛羊進口之稅已祛嘗一時以牛疫之事外至牲畜察禁甚嚴而牧者獲暫時之利甚優於是殉近利者頗持復舊之說政府拒之使其說吳行久之必墮而生害微論其無所利矣而民見小自營者不暇察也

法之通商先於英者百餘年常察理第八親赴義之尼波羅（明宏治七年事）其船艦之數自古言之亦不寡矣顧其國農業則遠出英下其法令於力田者無所矧厚也

案斯密成書於法人革命法之則其時法政令之瀛極矣於力田之民豈備無所縱貸而已刻錮權敵民不堪命不然乾隆五十四年之大變何由興焉田賦多寡無定程而勸賞神市之田則一切免租田穀牛羊必售其鄉部省縣城至嚴而農乃

愈病。夫國家之立政行法。誠一由至公。則農工商三業之民。皆無所求於厚我。政之獨厚於其業者。未有不愛而適害之也。國必於民有所損而後益之。民必於群有獨勞而後求助。無所損之。未嘗獨勞。何名而請益求助乎。

西班牙波陀噶爾二國接壤。而通商皆盛。其轉運多他國舟船。獨載赴屬境。則本國者。當是時。二國之外屬最多。而富厚。故其民重之。然其國無工業。少遠售之地產。而農業尤莽鹵。國中田荒廢者衆。蓋二國驚遠利。而波陀噶爾民尤樂走海。歐洲走海之國。先於波陀噶爾者。獨義大里耳。義大里古羅馬開基國。其地農工商三業皆優。力田貴穀。成器遠售。而交通者廣。史家龜舍丁尼言。察理弟八未侵義時。其國雖山田罕确。其受未與坦平原隰等。地處地中海三半島之正。中海綫綿亘。轉漕尤易。共主所都。梯航總至。此其所以利農事也。雖然。以余觀之。龜舍丁尼雖近世信史。其言義之農盛如彼。蓋未盡實。古義之農業。未必勝今英也。

國財必被諸地而後實。故國之以通商。凡工富者。使積畜不注於田疇。則其富厚常

難恃而不可久也。鄙語有之曰：商無定籍。此更事之言也。商長既厚，則其人趨利遷徙如游牧者之薦居。徙則向之養功勳業者與俱，故財積而不被於地者，非其地之財也。必小之若宮室廡肆，大之若田疇溝洫，既因既闢，夫而後其地爲有此財也。歐洲中古之世，有所謂漢細亞商會者，連十數地之商業而爲之，其隱賑動一時，卽今過其故都，求前跡之少留，杳不復見。知者徒以十三十四兩棋之中，同時記載所傳而已。義大里北部之民，多斥財以脩田業，則雖遇十六棋初載，與十五棋末年之凶災，一時工商之業，掃地幾盡，而狼跋民若吐斯堅尼二部之富庶耕桑，至今猶無恙也。其他若伏蘭德之遭虐於西班牙，數經兵戰，安都耐關庚特布魯支之商業，一時盡去。然伏至今猶爲歐洲最饒極富名田多稼之區，無他，工商之利易消，而畝畝之流難涸故耳。豪華之奉，錢帛之多，經兵事輒亡，經暴政亦亡。獨至溝洫既脩，土膏浮溢，民習勤苦，野有積儲者，其富厚常安而不可傾，非一二百年之暴征苛政，不至蕩然。此則僅見於羅馬解紐後之歐羅西部者也。